

國立中山大學叢書

黃任初先生文鈔

張雲



民國三十八年八月初版

國立中山大學叢書 黃任初先生文鈔

國立中山大學出版組發行

版權所有不准翻印

## 張序

民國三十四年十月二十一日，是黃師任初罹難的日子。於時抗戰勝利，我先歸廣州，期待着濶別三年的把晤。詎料天不做美，黃師沿北江南下，道過清遠峽，失足墮水，返魂無術，就這樣慘痛的告了永別。

黃師學貫中西，有過人的美德。豪快誠摯，使人樂於親近。他魁梧奇偉的身材，端莊嚴肅的道貌，更令人油然起敬。可是他不但挺拔起老師宿儒使人難看的臉孔，還喜歡講述滑稽的故事，使聽者往往捧腹。每當嘉會，酒闌興發，擊筯而歌，聲震屋瓦，激昂慷慨，有古燕趙豪士風。

我在坪石掌理中大時，黃師慨然降尊，屈就記室，事無大小，莫不躬親，職權所關，必謙虛研討，減輕了我對事務的關懷，而增加了我奮進的活力，嘗對人言，「青出於藍，我當輔之，以成大業。」誠摯熱烈的心情，令我感激到無可言狀，惟有盡着弟子敬師之禮，事之如父而已。

我在職時一切的書札和題詞，多由黃師代筆，雖片言隻字，受者如獲琪璧，奪他人之美，我常表歉意，而黃師却常引中國社會文字應酬之習慣以爲解慰。嗣更以積極的鼓勵，以代消極的慰安，說，「有爲者，亦若是，世上無不可之事，汝天賦高，努力多讀多作，自然有成。」當時我感到無限的興奮，可惜以動盪的時局，流浪的生涯，開卷執筆，都無暇晷，日月易邁，荒疏無成，靜言思之，深自慚愧！

黃師是個有舊學根底的學者。但又研究現代學問，專攻數學，爲我國數學界有數的人物，歷在武漢大學，河南大學，青島大學，中山大學等校任事，或爲校長，或爲教務長，或爲理學院院長，或爲數天系主任，都以科學數理專家的姿態出現。與黃師交游較淺的人，只知他是一位新派的科學家，但一經深談，莫不驚其對中國文學有湛深的造詣。當其在坪石領導數天系時，遠處十餘里外之清洞底文學院中文系的學生，竟環請其講授駢文，黃師欣然而起，善誘循循，嘗謂：



「此義務功課，較諸受薪而爲者，興趣更濃。」其誨人不倦的精神，真是令人敬佩！

黃師治學過程，待人接物與及生活狀況，在他的日記裏可以看出來。他寫日記很用心而且不間斷，數十年如一日，書法秀健，詞句典雅，內容不拘一格：或記高深數理的推算方式，或記象棋的得意步驟，或抒身世家國之感，或叙眼前景物，興之所之，拉什寫記。黃師某年由滬返汕，厄於水，致散失其一二十年間所作，極感痛心。然今所存者猶五十餘本。黃師日記，大部毀於水，而身復死於水，數亦奇矣。

黃師生平文藝作品十九存於日記中，今閱其日記，不論整篇零簡均極美妙，百讀不厭。所以自從在廣州舉行了黃師的追悼會之後，我便提議把他的日記全影印出來，但以目前物質條件所限，對此還不易辦，結果才決定將日記中有永久性的作品，及其他單篇文字先行抽選付印，同時並列爲中山大學叢書之一，這一方

既可使後學得人手一編，而起向往之思，一方也可使喪失良友的人們，在哀傷惋悼之餘，看了這部集子，有低徊想念的機會。

這是民國卅四年冬日的決定，請了作人雁晴祝南三教授主持編纂的工作，滿擬在民卅五年內可以完成。但以各人的功課繁忙，直至卅五年底。我赴美講學的前夕，還未編妥，我只得再三敦促，並聲明將來印刷的費用，完全我籌集，無論我在什麼地方，都可負責，相約加緊進行，以期早日出版，而了卻我們紀念黃師的一段心事。

但自從我赴美以至回到廣州，中間足經三個年頭。這個心願，尙未完成，極感焦急，延宕的原因，自然由於環境關係：一則生活不安，再則雁晴已離粵，意見集中不易。至本年夏初，作人來告：「選稿已竣！可備瞻錄。」我感到無限的快慰。適六月下旬，我再承乏中大，對於纂印工作，獲得人事上的便利，暑期中即行付印。至此乃可結束我四年來縈繫着的心事。

但於進行付印中，有應特別提及的，就是武漢大學廣州校友會，爲表示對黃師的敬意，在生活困難的現在，仍捐助港幣壹佰元，爲補助印刷之需。這種尊師重道的精神的表現，是值得我們欽佩的。

黃師文鈔編纂既成；編輯同人要我寫個序文，以述緣起，在我自然是責無旁貸，而志所樂爲。不過我於中國文字是個門外漢，對於黃師作品，本無資格論列，黃師文章的溫醇典雅，境界高超，以我鈍拙的筆墨，自難形容。所以我祇能真切把景仰黃師的心情，來一個樸實而坦白的敘述，就當作序文。其實這區區的敘述，又何足以表示我懷念黃師的心情于萬一呢！

孔子誕生二千五百年紀念日張雲於廣州石牌國立中山大學校長室

## 詹序

大道未喪斯文在茲脩名已立芳風不墜是以龍門載筆將以藏之名山魏祖論文謂爲經國大業胎息旣深寢饋彌衆雅鄭迭奏藻飾宏開自南朝之雅士暨北地之勝流靡不窮氣盡性握槩襲鉛希蹤繡虎之奇莫憚雕蟲之誚況乎負隼上之才究天人之學言行有盛德之風藝業備述作之茂有若澄海黃任初先生者其可不永廣其傳昭示來學哉於是則有張君子春南州英彥天算名家稱孔門之高第任馬帳之傳經爲輯錄遺文將付劂氏以余與先生同州郡諗先生之爲人屬綴片言以當啍引余以先生敷歷中外掌教上庠目如耀星舌如電光邊孝先之腹笥崔季珪之朗暢抗座論乎徐陵妙清言於樂廣固已青土蜚聲河洛鷹揚羣士臻嚮東南物望者矣自名高於天下寧假士安之序太沖倘聲希於驥尾竊附彥升之譽文憲夫核雕象刻遞有專家故不失其精泰岱華嵩不捐土壤故能成其大先生束髮受書英年躡屨萬卷能通三冬足用小學雅訓尤所嫻研得許鄭之心傳知戴段之未逮斐然有作卓爾不羣顧神明在抱故步難封理廣照而彌周氣深函而愈厲凡倭國哲

氏之書曆算天文之術旁推交通兼究並習俯鈎重淵之深仰探九乾之遠譬觀滄海莫際其瀾如入天都誰窺其闕斯則茂先博物未足方其闕通彥淵書厨猶尙遜其徧洽也若乃振采摛藻雲蔚霞蒸極貌窮形吹塵鏤影或上鮑家之封事或爲甘蕉之彈文或遊金谷之名園或過王珣之別業並皆覩物興情隨時據抱張儀檄楚以古鬱稱奇孝山頌師以壯勁標勝陸士衡之激揚鮑明遠之跌宕獨有千載時復一遭猶復遠本班蔡法其典則近承汪洪運以神思用能兼賅衆長獨樹一幟深窮黃泉高出蒼天大含元氣纖入無聞也屬天方薦蹇人驚喪亂黍離麥秀時或興嗟窮谷空桑寧能無感中情結轡放爲鄒宋之大言孤憤慨慷隱於莊韓之寓語卽交親還往聯語哀章亦百鍊千錘驚心動魄凡茲瓌碎散見日鈔片羽吉光舉堪傳世昔求闕越縵別有專鈔常熟湘潭不無分輯茲編有錄畧仿厥例各存面目麤見紀綱至夫天算之式象棋之譜字用法盧圖列梅花別俟影行此不具載云爾

民國三十八年夏饒平後學詹安泰敬序







示勻珪諸兒文體書	二六
謝張幼山賚酒啓	二八
中山大學理師兩院數天同人聯驩大會啓事	二八
徵刊丁雨生中丞百蘭山館政書啓	二八
謁墓記	三〇
勞山遊記	三一
記留東四川某生事	三三
撫時集詩序	三四
揭陽姚秋園先生七十壽序	三五
鍾母張太夫人壽序	三七
萬年山中日記序 <small>二十篇</small>	三九
不其山館日記序 <small>三篇</small>	五七

因樹山館日記序 七篇

六一

日記二十一則

六八

四十自序

八〇

黃松石傳

八三

國立中央大學教授蘄春黃君墓碑

八五

番禺羅鈞任先生墓誌銘

八八

鄭列婦羅夫人秀貞權厝墓碣

九〇

澄海黃處士誄

九二

國立中山大學新校舍落成頌辭

九三

附姚秋園澄海黃任初教授墓碑

九四

哀學篇

有序

歲行在亥九秋已盡苞篳篥實籜山雨欲來羈旅之臣不言守土余乃平章殘帙拾剝舊文于  
橐于囊患得患失相守平生分飛一旦何時歸去與爾千秋蹊路瞻望遷憎悵悵上念傳經  
歷尾之痛俛傷寒士聚書之難小邑海陬稀覩中原之文獻不其叢稿亦復浪跡之子遺忍  
令斯文淪於夷狄相率鷄犬踰彼梁山學術亡矣國乃真亡天下溺矣人實誑女夫入關而  
但收載籍其志云何欲其子之語學鮮卑居心難問四庫開館者七大半之書蓋已渡關而  
東世事可歎者三十五國風怯誦自郇已下侏儒操刀以爲學井硯坐井而觀天挹餘瀝者  
醉心反哺之功弋時名者齟齬效顰之舞一閔之市衆煦漂山畫地爲牢仰天而唾視彼插  
架無非言不及義之編便了購書不見蒙以養正之本俳優名士蝨蛆相依說士達官聾盲  
與比推原始作俑者或但求一朝之快意不料煽其風者輒奉爲千金之玉條等羣經于螻  
蛇挾書有禁箝士論於鄉校偶語可科雖有老成胡不遄死誰是先覺哀此萌生嗟乎其父  
報仇其子行劫公無渡河公竟渡河學變之禍心死之哀一至此哉况復竭澤而漁居夷無



可浮之海伐山朶木綿上無可耕之田吾黨之小子斐然先人之傲廬宛在鑿魯王之壁載器南奔逃嬴政之矧化石北濟弔懷在昔爲賦哀學之篇

緬古時之盛軌視周官之一書括囊乎大典網羅乎衆家洎幽王而禮亂雖素王而道孤被髮而祭於野如棠而往陳魚王者之迹以熄風詩之教蔑如非春秋之代作皆及溺而載胥逮兩楹之既夢始衆說分喧填夷子思以易天下許行耕欲有其田堅白異同雕龍談天家銜不龜之藥客撫無弦之絃微言曠絕大義泯然雜說之興一尊所苦矧以梟秦統一寰宇鞅新人桀傅翼於虎應令徙木亦亂法之徒指鹿爲馬而莫予敢侮師儒冠猴經書糞土名士縱多比鯽魚坑無不盡圖籍卽貯之阿房終付烈炬雖傳祚止二世極古今之多事叔孫生居然聖人酈食其自稱長者馮軾下齊七十城迺公馬上得天下徒好書律笑肥白之張蒼妙有辯才羨壽終之陸賈詩書於我安事此爲生民以來未之有也巨君泥古弁髦舊常更始之將婦衣繡驅博士避席而不講諸將笑走於吏卒橫舍不禁采薪園蔬生於虛室達士經生掉首不屈或夾書而入林或賃舂而行乞典文殘落風雲氤鬱諸劉畢文叔出老吏

垂涕而陳詞不圖復見漢官威儀於今日是故東京之治媿隆西漢三百載之昌期二千兩  
之秘翰天子方親臨三雍戒昧旦太后亦重鄉射之禮修興學之館豈知傳至太初學風畔  
嘒善士流廢章句陵亂清流以攬援爲名高儒生遂風流而雲散雖經牒之藏參倍於前而  
董卓移都學統中斷自蘭臺石室辟雍東觀典冊文章割散糜爛小迺制爲滕囊大則連爲  
帷幔司徒收而西者裁七十乘道路艱遠復棄其半鯨首剛足未足蔽中郎之辜赤眉黃巾  
直數至長安之亂旣而魴魚頰尾神鼎三分中原板蕩麋鹿成羣相尙玄虛罕通典墳華陽  
建國西不至秦量斗論才諸葛一人士元孝直俱西而臣數子勅善安與允南譚周已隰苓而山  
榛禮書樂經其謂何久矣蜀志之無聞東南之美不獨竹箭弘嗣並良史之材仲翔亦載道  
之選今曜亦漢之史遷不紀孫和而立傳孟德尙殺孔文舉幾亨虞翻於談讌一時清妙威  
尊命賤王業之興肇於鄴都崇山巍巍應讖當塗傾世才之八斗夸天命之在孤談經則繇  
歌朗肅述文則應劉陳徐莫不金聲而玉潤鞭蜀而苔吳皆一時之俊偉而後世之難誣集  
聖證以譏鄭尤蒙詢於吾徒其他荀楊孔禰才不保軀何吳鄧融李勝丁謚昧於進趣干戈之

禍亟矣自太初以至咸熙幾絕於天壤間者衛道之真儒世運之衰有乘其傲清談玄理遂以譁世苟<sup>新</sup>摯<sup>康</sup>之徒雖議叔制襲喪亂之灰餘移風俗而未濟自是衣冠橫潰天地爲閉值江左之草莽難禽獮而草薶宋齊國學時或開置而建國了無百年之基告朔空存餼羊之祭永元兵火燎之原勢鴻都經籍劫灰長瘞暨乎爾朱之亂散落人間後齊遷鄴頗事搜探河陽岸崩埋書江潭天統武平美令婁頌人不愛寶功不補患後周始基關右強鄰眈眈戎馬生郊喋血朱殷君子有猿鶴之感小人極深熱之艱隋氏建邦寰區一統煬皇好學逸書錯綜越大業之季年所喪失者亦衆唐興而令狐魏徵登庸並用祿山亂之乾元舊籍之淪亡尤貞觀以來一大隱恫黃巢干紀再陷兩京王室如燬弦誦無聲書旣亡于遷洛劫逐浩于廣明經天緯地所資以長存者又烏能與豺狼狐貉以相爭奉遺書而永歎愧作賦之未成

## 述書上

書之爲事本以記姓名而已獄讞日繁刀筆苦之別爲隸書便於輿皂急就章與解散隸體

漢俗簡情漸以行之

此四語節書斷所存王諸語

波磔猶存別名章草其非此者謂之草書

節黃伯思東觀餘論語

說文叙云漢

興有草書董仲舒傳草稿未上屈原傳云屬草稿未定似草書之名本於稿書鍾張二王大張其軍勿勿不及草書尤言其慎也時已簡體大行紆徐爲妍意之所之法可不論省灋之從薦以爲法公與之昇聲以爲與漢碑晉刻所在而然召陵解字難障百川陳留石經塵傳三體江左風流之後新亭塵拂之餘禮且不爲我輩設書又豈足萬人敵泉明讀書不求甚解東山得札題後答之蓋脫畧簡易之勢然矣卿之爲卿但存偏旁門之爲門劣得輪廓以意爲之而業大尊草聖縱筆吾書意造如有神女曹畫虎視犬之字不如狗固亦倡優所畜主上所戲弄一經有力負之以趨九萬扶搖萬流欽仰其時茅苴采女免置武夫口授竟成佳札曳泥亦解彼怒龍門廿品鮮傳書撰之人燉煌千年猶度藏經之字文章行行未盡彰彰紙筆紛譌殆難覩縷渡江名士顧影自憐韓陵片石狗吠僅免北碑南帖就此分量嫵媚獷麤各馳背道貞觀文物之盛如日中天昌黎伯文起八代之衰復有魯郡公以書援天下之溺大小麻姑立楷學之極則爭言僕射流行草之芳徽結字合乎六書用筆本於二篆欲

令正俗合契隸分共原正中有行今不背古法既彰矣而不過於嚴神既和矣而不傷於流  
旋中矩而周也中規心既正斯筆無不正仰止豈不廢江河餘姚唐錢唐北海率更雖年輩  
稍前驂驪天縱而或則食古未化格磔仍存或則變今未能法意交傲然亦莫爲之前之君  
子使我如登不見來者之幽臺有宋諸賢具體而微坡公涪翁有志未逮才力故足追古書  
法乃以從衆信賢者之不免能無望古而遙集也哉夫道既若大路然其閒必有名世者豈  
無陽冰恕先上武斯相懷素智永承祧右軍篆草分鏤後先一揆芬芳史牒流落人間而泰  
山僅留羽毛載乘如此廖寂建炎以後數至初明落落千年悠悠長古晦翁楷法廬樹典型  
道人麗書殊慚宗室香光晚出號祖二王其書大昌入清滋熾宗之者崇以牛耳毀之者指  
爲螿蟲而法乳懷仁兼祧蘭叙永嘉之風未沫筆塚之胤如存未可以其畫禪室隨筆之不  
經華亭里談之遺行一眚一德混爲一談晚有二王王羲之雅宜  
王獻之覺斯張以文祝衡山細書狂草妙絕人寰  
諸子故未及古人自一時之雋也後之作者已不逮矣曠勝清一代亦僅二王夢樓  
良常稍追明風  
劣見古意簡潔岸峭尙無擁腫之習自諸城儀徵恣爲碑說適便不學煽爲俗風大興未脫



館閣之羈懷寧時遺形聲之誤安吳雙楫祇善談兵湘鄉脊令止知其意涇縣弟子至乏滕  
更之徒板橋狂流遂滋曼生之蔓書雖小道乃亦遂無可言者矣別有懷璞者流好學沈思  
經有顛門辭無支葉洞六書之故通八體之原不言自芳未歌而韻書名或掩於其學真蹟  
恥落於凡夫論世者未必知人求書者莫穿其戶寧汨於狐貉以同盡行且濬淵潭以自淪  
引老姥爲知己揖古人而失笑以茲說字何異談禪嘗掃甬廬特縣名墨伯安惜抱心焉儀  
之里甫謝子高里有仁焉又有杭縣章揭陽曾蕪春黃武進屠並有著書咸標獨造義甯陳師曾畫  
品上虞經子淵印章可突冬心無慙撫叔居然千里一室異代同情近接遐思我師我友我思  
諸友已儕古人後之視我又將奚若乙丑餘生乙丑十四年十一月上海歸舟沉於詔安僅以身免良悔少作丙子去魯彌感壯遊  
頗思臥碑重拂塵硯去背古之太甚補壯學之未行庶幾墜緒茫茫復時聞鳴聲喔喔者張  
有不作幾見復古之篇竇息云遙乃賡述書之賦爾

## 述書下

作書惟心使臂臂使指指使管不假矯揉毋助苗長予嘗論記昔賢翦毫挂腕等之非法矣

記云子能食飯教以右手人生離乳而學上箸毋搏飯毋澤手飯黍毋以箸曲禮之言不行於漢故有借箸而籌聞雷而墮者夫其製也極簡而用之也曲當以之攻堅導窾兼弱懷柔無不悉如人意豈若西夷之人刀戟齊臨箝鉗列復助以手而猶棄肉委骨哉顧勝衣之童未必勝箸饗殮十載奏箸茫然謀食且如是之難而謂易於謀道乎臨池盡墨面壁九年不如匿舅三月之虞與君一夕之話內志正外體直相其蕩漾空中下筆以前之蓄勢迹其掉離毫末一往意深之行雲其轉也方則用翻圓則用絞其端也一波三折一唱三歎其入也直來橫受橫來直受其出也無往不復無發不收其映帶也左凝右盼仙禽欲下先偷眼其策應也擊首擊尾雁陳書空一字斜其燕居也見堯於羹見舜於牆無終食之間無古人其揮灑也虱大如輪目送歸鴻問爾師那一筆是自己是知入法之傳盡於永字盈寸之拳稟命天君世有不學而能者乎吾無是也今豈異於古所云邪子勉乎哉又思擇術至於伶工操縵以要時譽冀空萬人之巷莫賣明日之花要亦絃不斷不妄更功不十不易器原夫絲之於肉其利斷金鼓之於鏡如聲應谷憶當年孫佐臣琴陳德霖曲之一奏令人不辨其是肉

是絲譚伶爾鼓之三搗祇今恍聞其如抗如墜良工云往斯術寢微改絃更張元音蕩焉或則駢標罔絃助其靡靡或則獨標一綫鄙同哇哇豈無架琴在盤借水音以流響托絃於鉞假金鉦之悠聲斯並不登大雅之堂難枉知音之顧吾聞絃箏名手概屏指衣三折肱乃知良醫三日甲乃彈箏琶古樂云亡俗樂亦非輕改制言之無侶奏曲更莫對巴人黯淡江山蒼茫今古恐君思臥擊壤而詠焉爾

## 述交

書揭陽姚氏述德微言後

夫以孔文舉之有重名忘年而結汝爾之友公沙穆之遊太學定交乃在杵臼之間伐木丁丁鳴雞膠膠往往遇於班荆期之千古而况乎挹清叔度之坐問奇子雲之亭嘗託紉世之通家更復爲羣而拜紀者乎落葉尺深庭椿已拱江山易老警效如新折梅寄嶺外之人春風永挹索米困長安之市舊雨可懷用迹前塵載詠往德憶昔戊戌之冬日方巒莫登堂有客設饌無雞獲以鬢年辟咩執燭與林宗共載望若松喬狀李邕魁儀觀者阡陌予兄詔之曰此揭陽高士姚先生也汝其得從先生遊矣乎閔予不造蹭蹬秋風庚辛之際乃及先生

於鮑江撰杖之所逐流廢學釋筴而嬉猶不以其不可教而不教之後二年先生遂觀光京師陟泰岱載譽河洛之間我來自東則聞姚丈嵩生先生辱在下邑主于先大夫持論互日夜興學勸教以外無枝詞微文言汝幾不卒所業先君雖終言猶在耳拜東巖夫子之賜逾

于百朋

揭陽縣北上有石湖四時不竭頂有石浮圖下有二岩東巖曰竹岡相傳宋邑人陳希及讀書于此元祐中舉經明行修第一日爲廣南夫子故又名陳夫子巖見廣東攷古輯要

卜南安門第之昌不待五世矣王步

雖更薪木未毀畿沽館舍迭爲賓主姚氏內外羣從振振兮蔚起其遊學京朝者以十數皆矐于予予日爲蠅頭書則競先匿去以爲笑樂醜醜酪乳萃于一門遏末封胡何止二到酷似其舅有阿在之文章何妨不櫛傳左芬之賦頌人但屈指東南之竹箭我尤推心杜孟之寶田一經一籟其效可覩矣祇今觀之又二十年間事耳當年舞勺舞象之侶靡不各本所學顯用於時嶺南故不乏耆儒姚先生今最爲老師三推祭酒靈運穎生興言祖德士衡文賦祇誦清芬推于自出之耳仍共隆百年之心祭凡以使末俗咸知君子之澤遠傑士不待文王而後興也無改淑世之勤寄其終身之慕永錫爾類信夫孝之大者矣獨念際遇受讀父書見知蚤歲亦嘗伏闕從大家之讀摩肩寫太學之經而食粟畧同曹交誦言妄比臣朔

既無名于達巷徒奉手于通人重勞他山錯此頑石污爲故楮亦識精思能無甚慙下交軫  
懷知我手述德徵言一卷遙致南州孺子之芻蕘投玫報李卒章永言東海太公之化焉爾

### 復姚秋園書

秋園先生執事春初一晤未飶教言解纜北征倏逾三月低徊去日載馘高風難遂摳衣之  
誠時深健履之祝今之少年不覩耆舊諒茲開闡亦無畸蹤輒與晨夕良朋展誦曾丁佳傳  
莫不歎榕水之流上接望谿黃歧之秀遠承戟山者也僕以久中荒躄之氣每逐兩兔於同  
時而欲於營逐之餘妄策十駕于峻坂其亦難矣然先生善人之善不啻若已出而僕喜張  
己之長常慍不人知度量相越豈不遠哉近慚鐙影遠辱嘉評雖汝南月旦高子將之人倫  
而冀北羣空謂士元之溢量耳惟是齊民失學久不得趙德之師魯頌絕弦誰與賡東塾之  
記先生羣巒之領萬流之歸發爲文章資人菽麥推無行不與之志於號稱易治之鄉尤足  
令小子後生取則不遠矣時或扣鐘不鳴其道大轂而不其山下且有羅拜之黃巾本初冪  
前何須稱官之弟子高郵橋梓世業肯堂棲霞夫妻注經賭菴此緇塵之難浼卽清氣之長



存亦所以衣被羣生冠冕卿士者所見瑞安多識字之士華亭半明算之儔學會名以籀  
廡徐家世爲天監君子之澤有不必於身親見之者僕久負家山食言誓墓乙丑飛鯨沉舟之難急時自禱於天謂幸而免歸葬父事畢不  
再行縱闕里之多士北面甚慙忝扶風之及門東歸無易所以遲回遂攬轡也剪西窗之燭話  
雨何時睇南雁之飛因風將意云爾伏惟節衛不宣

### 致黃季剛書

季剛尊兄史席白下一夕之談等於笙磬臨岐贈語何止作十日之思惠我新詩傳觀知好  
萬流宗仰未敢私阿旋遵滬濱言歸舊館有寇未至琴床依然祭酒趙君深致心折屬爲傳  
語以當先容鬢舍環山士風椎樸惜乏先覺牖我後生國學鱣堂尤希清響願虛講席祇迓  
教鞭奚啻嚶嚶之鳴聊致啾啾之意庶幾曲阜墜緒高密餘風幸藉心傳平添掌故耳善宣  
令德遠貺佳音際遇臨書再拜

### 附黃季剛復書

任初尊兄先生左右別後數蒙賜書闕然不報以知我有素定能識察耳尊兄天性過人

其於友朋不愧久要之道虛懷好學絕去矜夸環瞻此世未有斯比顧第以萍泛之身未能樹立并生平所學亦厭棄之韜精沈飲泯絕見聞每見尊兄治學之勤進德之猛輒不禁望洋而歎所示日記序吉蠲無盜辭而音節鏗極似近世復堂大師之作第久廢文事姑妄評之丁鼎丞前邀遊勞山春假倘得成行當造精廬叙契濶也小第侃再拜言

### 唁黃夫人書

季剛尊嫂夫人禮次陡聞報載宗長兄捐館之耗嗒然累日追憶平生交相責善之義感念身後藐是諸孤之艱隨會九京從此比人間更遠居易未冠至今說長安之難夫人邁此閔凶豈惟家之不造吾道逢茲喪亂又值人之云亡真可爲天下慟也差幸二世兄行已長大諸第復素有父風滿篋遺書禮堂方須寫定鑿楹克日肯構信有傳人共挹畫荻之恩誰謂茹荼之苦金石跋錄報德父之嘔心李易安居士爲夫趙明城跋金石錄江都成書嘉喜孫之克荷江都汪氏叢書成於汪喜孫則夫人今日所仔肩者正非溝瀆之爲諒矣際遇自聞哀頗思南走親致唁賻並理遺編九秋葉枯一館匏繫馬首安仰驢鳴未申傳狀輓章藉爲奠告如需面命一葦可杭

## 唁黃念田書

念田賢宗世姪禮鑿并叩賢姪堂上清吉比獲報書斌然知禮之言凡屬素交同爲亡靈告慰事已至此祇有逆來順受膏梁文繡之場無名子弟菜根不齧不爲知味吾姪勉之身後之事待理萬端惟有三事須及今而言者籌思累日不敢默而息也喪具稱家之有無大夫亦三月而葬料量所費勿逾二千大學尊師不後於人撫卹有條需之今日可句旭初先生大力負之卽以此款平章喪葬豐儉失宜殯宮久旅非所望於賢昆仲者一也撫養諸弟後死共之孝哀大節經濟亦非小事念田賢姪見隸何校此後之計可於三數好友中商定一人卒哭之後襪被從之奉以爲師躬率小子之役但藉抄胥傳食而足此古今中外成人成學之法也大都究不可以久居尊公弟子姜叔明云都市子弟有錢者學不好無錢者無從學好訪舊稽存言之可痛旣幸得一椽之庇卽以爲三窟之謀入室他人歸田故里搨茲屋產置我薄田啜鬻布衣不失一鄉之善士革鞮過市非復三代之斯民毋貪建業之魚寧飲武昌之水鼓角山下雨聲彌清鈇鉞水邊湖光尤勝延先人半耕之緒讀舉世欲燒之書雞

犬桑麻并歆明德蓬頭歷齒亦爲愿人此所望於諸弟妹母夫人者一也鄭志八篇自須善  
述鄴架三萬尤賴明時一作呂期苟非其人毋裨爲枕中鴻寶世無閎識更不賴車下弋名韞匱而  
藏盛名无既亦有異文校於一手眉端細字行裏端書乙夜之勞辛勤所萃豈惟手澤卽此  
心傳便合傳家以待來者至於汎覽簡編原同屐貨聚於所好無妨達觀舉以相隨適足爲  
累博薪換米自古而然理蓋有方卽是孝道經權交守乃爲通人此所望於亢宗賢母者又  
一他借箸狂言出於至悃過車痛腹無負初心焉爾

### 復馬雋卿書

雋卿如兄左右漱望玉音爲日舊矣遐心匪遠舊夢可温比歲言溯練江薄遊珂里和平橋  
下摩挲信國之碑文相國有和平里三字碑在和乎橋下清平閣前低徊尙曹之澤一統志云在湖陽練江沙陵上宋尚書王大寶建瞻西山之寶塔人話唐

僧

相傳唐僧  
慧照居此

數遠遊之名菴我思吳隱將西北麻田山中宋逸士  
吳復古隱此東坡有銘辱二三子作十日歡魯酒醇醇齊諧俳弄世

態本如此刻畫前道之騶賢書信可人喧哄滿堂之腹馬萃飛孝廉妙天下  
演說四人擡橋笑林處也連席出也接輿羣季

肩隨履綦踵比日涉成趣庾信之小園半弓林不在深先生之宅前五柳邁郭門則桑麻彌

望遠塵世而雞犬亦仙平疇無輟耒之夫方舟急溯湍之楫寒礎莫杵蠟鼓聲中祭韭滌場

含飴節後躬謁扶風橫舍絳帳如新六明馬  
大宗祠指點史雲祠堂外黃伊邇過范  
家祠路旁相目競折一角

之中老父獨耕枉勞百步之道後晉進民漢  
陸老父傳事蘭亭未序東山之詩已傳輞川有圖摩詰之疾亦愈

斯遊疑非世有結念深于友屬聞爆竹除年催訪載歸人之棹忍聽塞笳訣別折繕書

蔡女之翰事見唐朝  
名畫錄極目去舟嘔心呷藥傳經未畢飾巾已矣哀樂靡常一至此哉從茲孤墳孑孑

宿草離離颯颯秋風蕭蕭潘鬢浮生多感況過中年涉世寡歡難逢知己雖成陳迹非太上

未能忘情追理昔遊夢中宛然在目天寒酒薄難成醉傷賦江南巴山夜雨會有時獨吟喟

北故人之祿未厚久斷音書下瀝之田就荒乃瞻衡宇方聚糧於三月無羞于王霸之妻約

偕隱兮何期忽遠致子卿之札揖使南首奉書叩頭遙知老眼無花聰明猶昨載詠孔懷常

棣兄弟莫如屬以題辭敢不將命惟是維舟在岸解纜來朝會逢孺子太學之歸挈依先人

傲廬之庇遲便鴻於鮀江之曲訂及瓜以爲期效倚馬於獵較之鄉當投李之永好焉爾

## 唁馬雋卿書

雋卿足下卅年棣萼一水蒹葭翹首高風感懷舊雨去年臘盡剋日南歸哭奠小祥悽依封  
壘廬居之側會燕片函驪駒在門又驚倭寇寇退則反學無常師芸人之田學古之道間有  
收穫寡所取資既思古人益念良友耳忽報書來陟傷絃斷此離之什蒺藜之宮回首當年  
撫心三歎聞弦而墜

戰國策雁從東方來更羸以虛發下之魏王曰射可至此乎更羸曰  
詎此擊也故創未愈而驚心未去聞弦者音引而高飛故創墮也

因風急天高賃廡而春思我布衣

椎髻

後漢書邊民傳平鴻傳又差書陸費  
傳注椎髻者一撮之髻其形如椎

何圖吾友重罹其屯忝屬通家素欽淑德方謂作嬪君子葛覃鳥飛

乃以倏渡中元梧桐葉落媼婢戚郤感緬遺芬童媿春杵咸爲罷相矧吾兄情深故劍誼重  
同穴能無鼓嚴周之盆杖劉實之制邪

晉書劉實傳字子真喪妻爲廢杖之制  
終喪不御肉輕薄笑之實不以爲意

第以去國萬里助引未能思君

卅年分袂無計書成裂帛權當誅詞寄奠靈帷並申唁賻云爾

## 復邢冕之書

冕之先生閣下邇來二十有五年矣非敢忘左右也特以所得於此二十五年者揆諸古今  
人百無一似坐是引拙自臧不敢徑達時從遠人刺問起居申其跂望而已前年陟彼勞山

適在從者偕沅叔督學勝遊之後名山有幸珠潘未乾載挹流風興懷舊雨歸爲遊記感誇朋儕後至王戎未克從公于邁更相笑也比以婦病溽暑南征甫息塵勞忽承佳札先生望高北海乃復知有豫州在我遇過西州竊甚慚於羊子悠悠去日不勝沒齒之悲鹿鹿覆車彌甚切膚之痛見知深厚敢不盡言遇也幼局呶唔冠軌象數自侍君子之教益顛疇人家言渡海極東從大夫之善數望塵而北嗟吾道之莫殫偶播菑畚旋同糟粕既逐食所焉託爰盜名而安之間好操翰羞比畫墁欲以八法軌於六書而自光武兵中之年至蘭陵遊齊之日數更府主坐失筌蹄空過屠者之門廢然不其山下因放越縵之爲記亦日知其所亡正領東之士音冀民不忘其本妄成日記卅卷富於東方所誦之言抽呈方言一篇潮州八音誤讀表說不啻敬禮宅年而定至於先哲名言新歐絕技各有所至不爲妄同佞拒兩非稗販皆是學術將溺於天下何夫子之不援孝章要爲有大名况賢者之有足因崇斯義乃發讐言

### 附邢冕之復書

白露爲霜我思君子雙鳧方去一雁旋歸展紙申函如慰飢渴先生淹貫九流旁通八法

殫心疇人馳騁文囿乃復不棄鄙野錫以高文屏絕俗書發皇故訓匪惟追揚軼章抑且  
凌江掩戴而弦歌之暇著述斐然文翁石室遜厥精深漢上琴臺同其淹雅斯誠多能君  
子博物張華昔存中載筆學者紀其淵深文定遺書識者驚爲奧衍不圖今世乃見斯人  
比一孔之士高言減字臆說國音大氏奉胥隸爲師儒踵佞盧之故智先生領袖羣倫甯  
能忍而與之終古耶第淹留故都蹉跎終老感脩途之多艱嗟炳燭之已晚而青雲天末  
既乏知音白髮鏡中彌傷遲暮顧瞻周道已痛淪胥東望海濱有同鄒魯何時訪鄭君於  
高密期成連於海上風雨連牀平原十日話劫後之滄桑見公門之桃李斯則白水爲期  
寐寤永歎者也山中梅鶴亮早偕行階下蘭枝度當脫穎北風多便惠我好音如盼瓊瑤  
俾紆杼軸專覆布臆不盡遭回

### 再復邢冕之書

冕之太史足下自被佳書時用自壯再叨儷札滋拜感情三年不言容爲破笑一刺已漫尙  
存諸懷荊州堦前既許尺地漢中門下不俟通家腹中黃祖何啻萬端心危鄭僑敢請小間



凡百事物存於自然厥于其間繫之以法聖者作之賢者述之中材以下守之而足法之爲物因時演進由繁溯簡古意或乖上蔡同文武康聲譜或頗省改自謂入神而滅鑿古文謬叔聲律適今變古功罪惟均六朝縟文五代沸鼎聲響相勝戎馬生郊文倣史龐鮮可省覽馬頭人斗極於宋明雖昌黎有言須畧識字楚金祛妄云去師心積重之下起衰實難南渡以還反經匪易茫茫千載徒奉隸書區區九千厯屬專業人不愛寶自焚自坑天喪斯文愈變愈烈引車賣漿而操文衡裂冕毀冠以阿世好揭槩簡字篡製國書兩粟鬼哭於今而信彼自逐臭醜醜而甘乃有當塗披風而靡著爲法令垂諸憲章自不識字與民同之曰簡字體三百廿四筮及卿士詢謀僉同簡省爲簡斯焉取斯閣閣鬧鬧何勞類舉丕可作聖怪字何从聽而作听听然而笑匠本盛弓不可假人袂以束衣類篇誤襪宋後有然猶曰俗書廿而爲念咻及吳語兒貌本同識者幾人贊賚亞亞所簡幾許蓀卿曰其爲人也多暇日者其出人不遠矣夫子所謂夫我則不暇如此典章徒輕世士繞朝而溺鼓吏爲羞女安之則爲之公不言僕亦不敢妄歎也榜諸國門敬謝結舌媿非小范無須畏譏逢此百懼譎及采葛

耳詩序采芣懼讓也江濱島瀨久慣獨行飛辨騁辭未聞心賞王霸之子禮則未知袁隗有妻箕帚而已  
一遊太學並在田間有子七人如交九尺東原求歸尙思一館九江林下猶有廿年自同昔  
人愈疎闊矣叩須我友如挾纊然

### 附邢冕之復書

前奉手教並辱高文東坡表涑水之碣不負平生中郎書有道之碑洵無媿色季剛先生  
文行茂美得公椽筆自可信今傳後今年晦聞先生逝世而侃叔又繼之黃氏清才惟公  
健在汪汪千頃之波亭亭物表之望惟期于左右矣時艱日亟天方浣辭哀我人斯於何  
從穀減字之說且令冢誦昔金輪制字孫皓作書但思取快一時詎足遠追往古今當局  
者無西夏造字之能解滿洲國書之物乃欲使聖怪不分雞難無別真可謂蚍蜉撼樹夏  
虫語冰昔頗憤嫉惟目笑存之耳

### 唁姜叔明書

不見祇三月相思爾許深亦度今市人更無能相愛護者因此益念共知辛苦之友耳自君

之出庭遂無人非至萬不得已或百無俚賴不能安於室時絕不下帷窺園與世人作鷓鷯之笑度世亦不知有此人矣今冬久不雪比日忽大雪拂曉入山踏雪雪徑皆未經人道如此鬧市久成獨行聖代無隱者料量山中不復作第二人之想足下又遠處南海縱一日三札鸚滅願言之懷一月初旬書報秋老拊去近文二首藉塵几側旋得秋老歸園消息知寄書不達忽以母太夫人赴來鈎比月日去足下一月九日最近來函僅餘四日吾道南行江水東逝終天之恨第嘗同之簫鼓聲中雨雪載途投止望門庫棺三尺以兄純孝能無骨立惟念太夫人耄耄之年賢昆仲承家有日商瞿五子一經可遺右軍之門五之並箸南被尉佗以冠帶西論圖緯於扶風皆非可得之井中牖下者尹珍從學經術遂傳牂柯季札來觀周道盡在於魯伏想伯母太夫人歸真含笑無復有涓滴繫念存焉者矣東魯經儒之邦承風有責敢援揚名之義以遏過情之哀喪虞諸禮準古酌今及今不定或將中斷總以爲吾輩今日所負之重非僅入口衣食而已昨今遇人輒詢石島何以自達南州孺子願致生芻茂陵長卿適橫病榻會喪已迫欲言苦多慮非其時僅將薄奠藉敬靈右企分苦思

## 復李廉方書

微兄書來何會相忘。塵落數行，彌增憤恨。既拜紙短心長之意，曷任會希別遠之懷。夏間因事一詣舊都，徐薛俞查共乘接席，經年積癢爲之一搔。旋復歸與棲遲山下，蹙蹙靡騁，落落寡歡。蟲蛀爲鄰，木石與侶而已。念古來學人未見有以老廢學者，而兒童豚犬尙不至責善則離耳。由是老不自量，猶日丹黃冢誦之書，少不如人未遑袒裼，課程之國楹書具在，咳蘭渺然。苦比茹茶甘未噉，蔗個中得失就正。未由方寸卷施，藉公一發。云爾。汲中故人有垂問者，爲道未忘結習，猶有童心可耳。

## 致蕭韻庭書

比來巖谷遯荒，楮墨並缺，彌少通訊。行其疏嬾，旬前會一致書，良無甚事。不過山中桑麻之語而已。記書末託轉致成中教授，代將柳州賀王參軍之意，所謂若果蕩焉泯焉而悉無存。茲吾所以尤賀者也。飢來驅我復爲人師，前日歸廬村，尨猶似識我，益感天地親師之所賦。昇者良厚，我以攝身勵學，應運之旨自策，且以勗諸兒曹。足下同氣同聲，正不知如何同感。

耳昨朝半日清談等諸笙磬前輩風流露潤久雨彌光在僕私心夙欲竭其不文存之樽史蓋深感髫年之知遇父執所習聞復重慨鄉里後生鮮能自顧其睫鄉賢先達不克舉其名字故久思發爲載記以俟有事地方志者之別擇耳矧以君家累葉畸人卽僕及見之世一門鼎出能不耿耿於心哉日者還自深山兩袖雖敝尙無京洛淄塵以之稱誦先芬或可得三數語不盡食人間烟火者不然祝嘏獻詞昌黎諛墓在昔中郎猶且不免茲亭林之所以畢生不爲一文也歟草草述懷不罄什一

### 與陳季超書

涼風送暑新月迎秋僕僕征塵蕭蕭落葉每念左右輒爲低徊比者還自舊都依然敲戶敗書一架濁酒一尊療其素貧寄其幽想而已足下以長袖之才扶搖碣石亦嘗彈冠之暇眷戀嵩雲否善護景光敬勗勳彩

### 與陳碩友書

得知千載正賴讀書作吏一行遂廢此事而研田可耨結習難忘自遯空山復修舊業舌耕

助讀手錄成書亦媿面牆不堪覆瓿寒天歸棹聊當土儀一雁南飛繫書將意

### 石牌村中與婦書

涼秋九月殘暑猶驕逖聞廢都立冬已雪卅年北雁一旦南飛節異地遷履霜增怛白雲山下非無故人紅豆花枝實生南國於以優遊文酒采擷芳菲時泛訪戴之舟亦尋季隗之約同聲難得人生幾何卽此歸林奚悲秋草屬遭時變勝會不常期月之間跡留人往姜生返棹秋叟灌園文學清言倏爾契絕又疑侯門海闊客路三千蒹葭蒼蒼榛苓悠悠之子有行肥泉永歎獨遺異客苦恨江南無酒則盡人不識偏君輩姓名難記有酒則無人不識從夷門屠沽者遊大學之大所居成聚小之又小其鄰有村王化未漸野尫不吠縱其屐齒往據石頭鴨鷺可盟桑麻與話想卿聞此亦爲軒眉地迫林深何來一老秋園石交楊翁鐵夫七十之年千里不遠謂予膠東之館道接不其讓西之齋人指因樹冥冥之行昭昭之功旣聞所聞而來不能無見所見而去不圖所南心史未函井中竟蒙漢陰上人遠來海島炳燭披蠅頭小字老眼無花削簡譬馬足異文秋風落葉猥稱克賡東塾之記清於越縵之聲卽以

汗青無俟頭白叨敬禮定文之賜奚事宅年感豫州知我之言證以此日得友之樂何如枯柳揩疥爲之加飯讀書頓忘况瘁起視明月霜天正高陶陶心期與卿共之客夢安隱首藉而甘老屋雛兒殷勤將視聚脹三月博經一簾爲卿護鷄竊比高鳳

### 示勻珪諸兒文體書

詩至唐之排律賦至清之律賦遂極工整之盛軌韻叶之奇觀汝曹於唐詩二百首及賦學正鵠各嘗讀過幾首知其格式矣今爲汝曹言駢體文文有駢散二種經傳子史之文大抵駢散並行奇偶錯變試取已讀之文覆按之當絕無不具駢句之文五古七古歌行處處必插入對句其氣方有停瀟不至一瀉無餘其聲調亦覺得格外鏗鏘音如金石卽如善詞令之人說話試細聽之其中夾有如許並排句法此亦自然界中一種自然之理至專以駢體文稱者汝曹已讀過屈平卜居漁父辭陶潛歸去來辭孔珪北山移文王勃滕王閣序駱賓王討武曌檄杜牧阿房宮賦李華弔古戰場文韓愈進學解祭田橫墓文王禹偁待漏院記汪中自序余之爰旌目誅等篇此等文字較難上口選本所未及者更無論矣然駢體文不

但爲文體中不能缺少之一格且可認爲文格之最高者予於此道素疏向來亦未經爲汝曹論之家中藏本又多未備比年次第得庚子山集汪氏叢書洪北江集茗柯文編越縵堂文集壽愷堂集縵雅堂駢體文國朝駢體正宗四六箋註續文選八家四六文註國朝十家四六文鈔等書方計日而讀之近人中推汪中爲最高而選本多未之及殊不可解洪亮吉李慈銘予所最愛讀者選本則以王先謙駢文類纂類目宏富取裁得體此書尙未購得茲亦非欲詳示汝曹駢學姑檢出國朝駢體正宗一部圈出毛奇齡與秦留仙翰林書陳維崧周櫟園先生尺牘新鈔序袁枚與蔣苕生書邵齊燾答周芝山同年書送顧古湫同年之荆南序汪中自序漢上琴臺之銘阮元重修鄭公祠碑蘭亭秋禊詩序四六叢話後序洪亮吉傷知已賦序八月十五夜泛舟白雲谿詩序適汪氏仲姊哀誄與孫季逵書與孫季仇書出關與畢侍郎牋劉嗣綰頤園讀書記山中與鮑若洲書吳鼐八家四六文鈔序彭兆孫與吳韻臯書凡二十首有便舟南歸寄示汝曹先鈔讀之他日歸里再爲講解或以所得者分餉儉腹耳此示



### 謝張幼山賚酒啓

躑躅青齊當鑪誰侶，裴徊塵井買醉。乏資佳節，每逢撫楮，權而賈涕。良辰如此，抱明月以長  
終。忽荷隆施，沾及口腹。行此直道，沁我心脾。仰子傾囊之高，免其罄餅之恥。方將沈浸醲馥，  
薰沐芬芳。既乘興以展遊，復詠歸而墨舞。栖遲之下，不負名山。酩酊之中，猶知銘刻。

### 中山大學理師兩院數天同人聯驩大會啓事

蓋聞五星交會，天啓其祥。兩大升恆，經著其象。吾黨疇人，子弟職兼。天官竊從，商高大夫。亦  
稱善數，而北箕南斗，散在四方。東序西庠，艱於一面。甚非吾儒，以友輔仁之旨。亦乖大學一  
貫，求是之真也。茲者江南草長，故國之旗鼓，如何河漢星遙，玉宇之天孫，在望矧彼鳥矣。求  
其友聲，況吾人斯未見。君子用敢發爲騶唱，載詠鹿鳴。修禊於槐花黃前，浴風於鷄鳴山下。  
雙柑斗酒，祇迓蠟屐之阮生。輞川旗亭，共參談天之騶衍。庸非我大學數天同仁所深許者。  
夫謹啓

### 徵刊丁雨生中丞百蘭山館政書啓

兩生先生嶺東竹箭海南明珠由循吏而名臣合儒林於文苑一洒處士虛聲之恥豈直潮  
州耆舊之賢以言著書亦盈百卷

公所著有詩文全集百蘭山館詞巡鹿公續佳話公續佳話摘要落吳公續吳閩全稿  
手訂法人遊探記地球圖說西法兵畧七種牧令書輯要吏治書輯要持靜齋書目各如于卷

得其緒

論可當百城對策一封書咸仰斯人之不出藩吳八個月至今吏治猶師之而棗板所傳塵  
于麟爪禮堂寫定文鬱薰膏其經國謨猷畢生精力尤在百蘭山館政書十四卷中入告爾  
后胥賈山之至言老無宦情猶留侯之畫策知閉關之不足以自守則勅水師興農政皆力  
行之以新子之國謂投鞭之不可以斷流則籌遠交謀近攻是臥榻關也豈容人鼾睡公固  
嘗言國家爲重千秋爲輕吾黨亦謂豈秦無人謀適不用乃公薨一年而有甲申之役又十  
年而有甲午之役又未十年而有庚子之役太息徙薪無力想公猶涕淚於九原詎乏補牢  
之書惜莫傳天人之三策謹按全書四十萬言寫成一千餘紙經公手定比諸心傳舉凡整  
軍經武柔遠撫僑錢穀刑名鹽漕保甲竭股肱之力達古今之變施之當日旣以通民隱而  
洞吏情垂諸方來亦謝以千金不易一字潮之爲州也去京師萬里苦海旣千年稽公之禦  
盜綏民籌邊靖海犖犖大端纍纍名牘百蘭政書其燦然者矣近之不慚東甬襄敏鄉賢上

之亦方元敬石齋國士至於文章茂鬯美不勝收政學兼施優布在方策半山萬言之策同  
耀千秋宣公一日之書可成數百而兵燹之賜金石爲摧國粹之亡文獻尤痛其卒使吾儕  
子孫不復上窺吾鄉六十年前有此一介臣焉憂深慮遠心盡畫周之有如此者庸非今日  
吾儕之罪也夫啓等或及見琴書或及聞詩禮高山仰止發楹彷徨一片瓣香陳經列庚子  
之拜千狐集腋成裘藉庚癸之呼竊意諸君聞先生之風當共深後死之責挹其廉泉之惠  
注彼寫宦之資親覩汗青無竅頭白一編可遺豫卜世有達人百世之下如友士之仁者爾  
刻書一瓶還書一瓶畧具左方條陳概要謹啓

### 謁墓記

辨色而興促小子起起汲水須嗽振衣東行言邁郭門東方始明日出皓兮樹梢不動牛喘  
可聞經日驕炎長夜未解隄行六百武先塋安隱宿草鬱蔥遠山崢嶸近水清遠展拜之下  
可以栖遲可以眺矚穉子捉蛙以當螢牧童橫笛而度犢青青廬側之秧離離園中之果靡  
不涵餐清露揮灑天然於以濯足滄浪息陰涯涘亦足飲思先澤高謝緇塵聞人過者共式

黃公之壚今我來思甚慙郭兒之孝

## 勞山遊記

晨飽餐臘腸蒸飣犒携罐頭麥酒旅具之屬評校車驅迎游澤叟姜叔明張怡蓀張王夫人登勞山膠島初夏猶是春和景明我負名山裹足二載矣

辛未初夏備開一多黃率伯方令  
孺女士等入山一次三宿而還

三十里至李村

南折烏衣巷梨樹已陰楊槐初綠禾油麥秀海碧天高布穀催耕飛泉流响鳴騶入谷村犬吠風始皇帝之車塵而今安在逢徵君之棠蔭曠古如新望三神山之蓬萊其存其沒睨五百人之田島可泣可譎藉此望古遙集之情殺其我躬不恤之感同乘共載求其友聲駕逸絕塵出自幽谷清風滿袖笑語滿車奇峯倒迎村童駢足近海有村名曰仰口歐戰時日兵攻青島登陸之所今韓軍方深溝固壘軍作方殷邊將失官守在領海矣披髮杖錫遑論魏晉車行一百四十五里需時八刻急湍峻嶺行有戒心車道盡頭豐碑屹立山海奇觀四文大可逾丈清乾隆巡撫惠齡所書書手不及石工了無驚人之處聞且以此被劾落職博得行道口碑遊人載筆大幸事也逶迤西上夾道蕭森二里而遙抵華嚴寺耐冬尙花牡丹半

落僧門之下可以棲遲當地素蔬別饒况味土人呼爲  
秦頭米果腹既畢整衣頂禮那羅寶殿梵唄聲宏  
明憇山大師駐錫於此怡蓀頗通方外文献素住持開閣摹經同遊者共仰憇山手書七律  
鉅幅摩挲不釋余爲遂錄數紙遍貽所好詩云獨上高臺眺大荒飛來空翠灑衣裳一林寒  
吹生天籟無數昏鴉送夕陽厭俗久應辭濁世濯纓今已在滄浪何當長揖風塵裏披服雲  
霞坐石牀署登小金山妙高臺作僧清印二方曰僧印德清曰憇山道人周肇祥意其白衣  
講道羊城時寫寄山中者斜倚禪牀聯句解臣善戲謔今未敢存錄未刻垂盡方決計摩白  
雲洞以補前年西行不至之憾洞去華嚴寺不滿十里而巉巖壁立攀者舌擣鼓勇直上張  
婦亦從捷者伸眉後者短氣未肯託足肩輿大懼跨步折齒落帽有孟嘉之侶振衣邁太冲  
之豪已刻未終叔明拔幟先登張君夫嬾亦與澤番接踵而至據欲墜之巨石蔭橫空之蟠  
松登東山而小魯先入關者爲王俯仰蒼狗之光吐納白雲之鄉披襟當東海之雄風引吭  
譜大風之泱泱終隱在心夕陽在山長揖高歌予歸去披葦捫壁予予相依投止寺門低  
徊樹影老僧溫勞村婦笑依鏡鉢齊鳴緇塵不浼何以解憂惟有杜康何以永夕坐有東方

縱一榻之所如凌萬古之茫然暮鼓晨鐘朝陽掛戶山中日出爲天下先

## 記留東四川某生事

川籍女生某留學日本東京竹早町女子師範學校藉藉有聲女校長器愛之逾於常徒問字之外且令就宿其家焉時有同籍生某君心焉愛之顧以禮自繩未敢通款女士但刺得女士里籍馳書父母向女士家長求婚焉女士居女校長家其家之小居停則墮落書生也非我族類實逼處此女士慧覺之乃託詞僦居他處顧以師生之誼時尙往來女校長之門一夕留飯飯已而大雨傾瀉不休主人覓車送客車以油幕籠罩車夫亦深衣大笠不可辨色奔駛越程杳不知其所之也車停而七首見閃爍逼人嚴詞喧嚇謂今夕之事一言而決得之則生不得則死俺之相伺非一日矣女士辨聲方恍然所御車夫乃小居停之化裝林野曠深強禦咫尺十年不字俄頃死生不復有盤旋迴盪之餘地矣乃忽有一少年突起草莽之間趨兇手搏鬪女士得間蓬首跣足逸出號慄邏者尋聲而至女士乃知遇險之處爲上野公園也踉蹌歸寓忘忘未曙而朝日新聞晨刊已越扉送到赫然二號大活板字大書

支那留學生殺人女士如醒方夢如海浮大石事之離奇寧有至是者乎異史氏亦適居東聞之蜀人曰支那留學生者卽川某君也某君之於女士備致傾愛之忱且備知將有不利于女士者故由愛慕之切而隱爲保護之勤或先之或後之情之所鍾金石不渝況彼已得川書詳及兩定約事則女士已爲其未婚之愛儷哉情鬪之下勝負分焉殺人者死爰書定矣女士脈脈寸心亦惟有向所謂支那留學生者揮一掬同情之淚而已四川同鄉會極鳴不平籲之留東使者若監督等抵倭庭力爭僅僅弛此垂死之命其時女士乃得家書天乎痛哉畢生之所天竟爲嚮夕之鑣客須臾之決鬪卽爲終身之定情於是詣庭申辯洒淚鳴冤辭旨清哀聞者酸鼻卒以徒刑十五年定讞某君以偉大之愛求仁得仁甘之如飴耳而造物不仁以情場供犧牲以青年爲芻狗悠悠蒼天尙何言哉乃者巢鴨狂狴之內有聲淒楚如泣如訴則女士與所愛者訣別之一幕也女士卒廢學歸蜀爲某君守此十五年之約云余當年尙能歷歷道其姓名今但撮記其事畧如上方

撫時集詩序

蓋有顧瞻周道對禾黍而興悲宛彼鳴鳩詠鴟鴞而結歎者矣廢池荒壘蔓草自春失羣塞鴻聲噍以殺故鄉壯士望古譜大風之章易水白衣祇今傷漸離之筑自來詞客屬際衰朝並有離音申其牢悃而况蓬山風急激抃巨鼇青冢霜寒長驅旅鴈何處灑新亭之淚行見汝荆棘之中哀我人斯胡天此醉王子士畧海瀕一介書劍丁年胸具十萬橫磨手障百川東倒寒笳管短發爲從軍之歌秋士悲來綴成邱仲之曲如聽白石清角冷月城空欲振鐵板銅琶大江東去庾子山江南賦後幾見賓王劉越石河朔樓中獨懷士稚嗚呼虞淵可返矢共彎后羿之大弓社鼠未殲亦永標梅村之詩史

### 揭陽秋園先生七十壽序

夙聞天下談士相聚而言但願一識韓荊州野王縣令慨然歎曰去人遠矣羊叔子際遇昔以嶺東童子叨計公車久耳楚南先生不翅儒域楚南秋園先生之前字也何令人傾慕一至於此隴西流落之言恐沒世不復見如此人右軍毛骨之譽先生文驚海內未及光武軍中之年賦哀江南成於甲午蹙國之日禁中傳誦致恨不與同時馬上露布儻焉不能終日



未知先生者以爲必耆儒碩學如八九十者也儒冠誤我且以爲天下憂學劍不成去而學萬人敵南豐兩字終屬先生北宋半山嶄然後起匡衡抗疏劉向傳經員餘慶岸然以半千易名領以東繇是有桐城之學古文掩於八比震川韞山麗語棄自中年異之曾亮述學三九幾索解人傳燈六一善哉居士劉賁不第吾輩羞顏羅隱無名秀才說過要是一脈千鈞之重豈啻二十七松之賢粵慶學將廿七松堂集天方薦瘞終身不復東面時無所後吾道於焉西行文翁石室之遺錦江澤永尹珍函丈之下牂牁流長時先生年方強仕而道濟天下有如此者出偶與人家國事與賓客言退卻常在山水間驢子背上收武陵六橋淑氣並入秋園挹燕趙三疊悲歌譜成學苑插架三千多於筍樹人百年國之本老猶聰明沈麟士之手寫聲出金石劉海峯之心傳因聲求氣之至言口耳卽成師友畸剛毗柔之微旨張吳僅及阼階並有箸書未慳度與所藏篋衍都爲不刊畏廬後數授徒以文鳴者僅有蜀劉厚涖揭姚末學所見選本吾粵文者止於曲江玉生一師私說敢引爲榮百家著錄亦非定論夫以彥和艱於一字猶自負車知幾不調十年幾瀕投閣而南學祭酒一見優曇貝海徵文孤青梨棗此則陞

下好武而顏駟好文亦例諸祖生耆貸與阮生耆履而已天或未喪斯文世殆渾忘此事而先生入此歲來年七十矣滿眼干戈幾人知故稱心斧鑿並世寂寥屬孔李通家李張小友魚泉濡响駟蛩依遲微武子兮吾誰與歸撫正平曰正得祖意茫茫西望常歎今去之鄭生滔滔東流不復撫弦於成子山民橐筆深徇修撰臥楹之知寧人鮮文敢峻天生壽親之請室邇人遠我勞如何無以爲禮侑之以歌歌曰道未墜地雨晦暄天思子東山忽焉三年魔高十丈道高幾許子所至者去天尺五二王三洪以學世家今於南安云胡不如古稱上壽百有二十才過半耳道在不息經儒多壽往往而然段桂朱王實爲之前非經壽儒非壽不儒琴書千古風雨一廬鶴清而頡樹聲皆韻嵩亭之前長貽庭訓黃岐蒼榕江湯湯徘徊溯洄如何可忘

### 鍾母張太夫人壽序

潁川著姓鍾繇標善書之名萱草無憂張綱厲清節之望不以仕而廢其學可知堂構之賢聞其政未式其廬已卜閨門之教冠球君以不世清才屈百里令長三年風偃一縣花開

甘棠之陰聽與人之誦使君到喜兒童騎竹馬而郊迎潘岳有親父老欲板輿以漿奉民食其德人以爲榮自嶺以東未有如鍾張太夫人者也太夫人系出清河家承耕讀五華鍾公顯廷方勵志鋤經小人有母驚心故劍中饋無賢於是求弋雁于敬姜諧伯鸞之梁婦必有酒肉體會子養曾皙之心躬執巾櫛謂寡君使婢子箕帚不形於色芭蕉萃靡出諸聲秋螢半曩月夜有待客之寒砧一杵閔氏無啼饑之兒樂夫子采芹之歸于以采蘋虔祭先廟稟歐母晝菽之訓譬彼畫虎垂惕後昆終令長女歸贅秦並山陰之選不獨親親子子飯信哀王孫之窮種得於公之門五百之孤寒垂蔭進號嚴氏之嫗萬石之封君媿榮人指五之之門庭世豔二喬之夫婿太夫人顧而樂之之中獨深生可求乎之慮雋不疑行縣而返必問平反幾人李景讓治軍有年不寬兒時之笞宜乎鍾侯諸賢昆仲琴堂春水懷南陔生我鞠我之恩簡書露冷數北堂倚門倚閭之日舟泊修岸猶憶飄篷檝奉公朝敢忘覆餗方赤眉之肆毒煽青犢之劫灰焚山及綿上之田問津乏秦時之舸太夫人誓守先隴遠涉其帑火焚趙禮之居躬陳大義箭及薛包之室無惜兼金卒之銅馬解圍武城之薪木如故黃巾崩

角鄭公之桑梓無驚室家叨再造之恩比落蒙瓦全之賜以今思昔援古例茲稱引嘉言皆非溢媿况值太夫人六十覽揆開百歲之期頤二月花朝播五華之椒瑞庭深護翳堦前之玉樹交柯日煖春暉海上之蟠桃齊熟某等瞻傾婺曜被若慈雲介祉心同撫塵誼切能勿揚南國之隆化薦魯酒以延年又指鯁生粗解文章屬爲賢母畧陳梗概重違嘉命遙獻嘏辭

### 萬年山中日記第四冊序

山中無消夏之方日長如歲亂後讀小園一賦心枯於僧間亦效馮婦之下車逼迫上道幸不爲馮驩之彈鋏歸來有家勒馬不待臨厓入山何須披髮盜竊文史之末因循書數之間箕坐巖顛廁身蟬蛭斯亦由之不知其道而爲之猶賢乎已者矣方今中秋風飛中原雲漢先生以困人天氣中酒心期客去必手一編興來輒書數紙未可貽之好事或以寄彼知音兼葭可懷悉蠶入戶時聞蟲聲之唧唧助予懶祭之條條結念芳華游心道藝但求克己何用不臧若以方人則吾豈敢任初自序

## 萬年山中日記第五冊序

先生就館於海之瀕稗販絕學肩負傳薪其道大艱其生不辰奄有講席徒數十人加減乘除言之諄諄言稽籌策如數家珍退食自公與古爲鄰古今枘鑿藝器雜陳日記盈寸大疵小醇多岐亡羊其徒斷斷朽然自得走俗抗塵徒曰異哉先生之學伊古經生學稱曰樸一經可遺比玉之璞否則譁世睽睽所目策名清時蜚聲流俗安能泯泯藏諸韞匱吾儕從游信道頗篤竊所未喻敢請發覆徒言未竟僕誚於旁聞諸人言衣錦還鄉宗族之榮閭里之光仇讐膝行親厚扶漿我來田間引領相望共指達人以爺呼黃胡云是歆苟無相忘會是北來終日皇皇炳燭伊唔聞雞彷徨無顯者來曰善刀臧先生之風山高水長子雲解嘲孟堅賓戲宋玉東方厥叔文例平子應問亭伯達旨進學送窮亦師此意望古遙集學尤未至鉅經致知胙匿典記幼學壯行百無一遂違古悖今婢歎奴啞人之多言云亦可畏吾以鈎稽安其寢饋豈敢盤桓有所希冀民食芻豢流分涇渭爾無我黷先生已睡壬申二十有一年十月任初自序

## 萬年山中日記第六册序

自左氏屈原始以文章自爲一家而稍與經分

困學紀聞卷十七引汪彥章語

曾滌生亦謂左氏傳經多述二周典

禮而文辭爛然浮於質矣其序湖南文徵又謂離騷諸篇爲後世言情韻者之祖夫言之無文則其行也不遠然言之無物則載道亦託空言故楊雄曰今之學者非獨爲之華藻又從而繡其聲悅君子於此以覘學術之隆替也馬班史書列傳儒林蔚宗後書乃析儒林文苑爲二坐致代有間言斯亦禮樂分崩典文殘落之餘所未如之何者蔚宗不云乎自是遊學增盛至三百餘生然章句漸疏而多以浮華相尚儒者之風益衰矣士生千載之後抗志文治之隆雖欲痛自濯磨豐其毛羽而利歆於朝學囂于市一齊也而衆楚轍北焉而轅南姑未論通經至不易言通經亦復何用文章可以華國文章亦等芻狗而所謂經者何經通之道安在所謂文者何物文之何以成章此中人語云不足爲外人道也按劉熙釋名經徑也如徑路無所不通可常用也是卽放諸百世俟諸聖人而不惑無疑者爾雅豈爲字書久儕經傳之列周髀首言積矩尤爲算經之冠

近儒亦以幾何原本及 Salmon 圓錐曲線論比於聖經 Bible 爲三僻作

原夫上古結繩而治將始

也極人事之至簡泊乎巧窮符號之學將數也盡宇宙之奇觀吾儕終以爲論道經邦燮理陰陽者不區區囿于飲食男女之間於是焉崇六書九數以補羲皇三墳五典之遺推汪洪李孫以爲湘鄉三十二子之殿後之論者庶莫之能易也又按說文文錯畫也象交文章樂竟爲一章從音十十數之終也餘杭章師曰文學者以有文字著於竹帛故謂之文是知不特傳之管絃播之詩誦者方爲文章詩詞旣備有聲之畫表亦爲無韻之文披圖可讀原屬無音按譜而稽具有定則凡夫八風從律百度得數皆謂之章周旋中規折旋中矩皆謂之文文章之道通乎神明通一經者皆與其選吾儒挾其學問思辨委它乎迹象毫釐之末遊弋乎埃壒沉廖之表其所耳聞而目見者遠出乎四體五官之感觸其所心會而神怡者極之於調和彰彰之美妙私以不龜之手彈此無絃之琴笙鏞以閒鳥獸踰踰聞此中人私相告語曰天下之文章在乎是矣予衰將艾懼失攀援竊以餘勇賡此絕業吾慮無恙何事已旌名山可臧不藉聲氣樸學者畢生之遐功文章者不朽之盛事爲斯言者

方彥聞序董方立筆語

可與共

學而已世無仲尼當不在執鞭之列江河万古日月經天空山無人權自鞭策是爲信條卽

以自序

## 萬年山中日記第七冊序

予之重爲日記五月於茲尙未間輟其中得失可畧言焉循日讀書過境豕忘矧迫瘵年尤苦罔泐自爲此記日知所無羨魚結網亡羊補牢襞積之勞亦收寸進其得一也學海汪洋師友睽絕私門講學最書已難幸近高密時沐流風叨接蘭臺常伊秘笈撫所聞見實其簡編解彼嘉言撰爲已出雖不敢久假不歸然亦惡知其非有其得二也先生述之門人記之傳習有錄日知成書登鱣堂益慙儉腹用自札牒以存爬梳雖寫定之難言已响濡之有自留之它日或以覆瓿遺諸子弟聊愈兼金鑑覆轍於前車認識途於老馬其得三也其他人事變遷陰晴演化瓜桃投荅鹽米出納不免并存罵坐豪門之態絕索冠纓之辯時埒見焉此先生之貞屑亦入聖之障魔也爲失爲得不自知矣壬申十一日任初自序

## 萬年山中日記第八冊序

日記者一個人之流水簿也子張書諸紳志之不敢忘也顏淵退而省其私省其所私得也



然則私門著述之最凌亂無章者莫日記若也然記述中之最可自信而非有所爲而爲者又莫日記若也日知其所亡月無忘其所能有得卽書不假排比此或天下之至愚者方肯爲之顧成名與成學不全相同學問之事又非盡出諸天下之至知者愛廸生之成功也自云得之靈感者什之一二得之血汗者什之七八夫知而不行與不知等不實行者不爲真知行之不券時有新知是故以際遇之頑魯望道而未之見而仍懷此以自壯也况所治者乃極抽象而論證極嚴之學機稍縱而卽逝思稍鈍而卽塞駑馬十駕輒昧前程愚公移山失之眉睫個中甘苦惟于青燈有味時聊自知之然此境已不過日月至焉而已矣山居無人事之苦往往經月不入市廛而所得者僅止於此知難而不敢退又未始非此勞勞相依之日記有以策予也是用作序敢告執羈壬申大雪任初記

### 萬年山中日記第十一冊序

天下事之最不易爲者莫自欺若也天下事之最不可爲者又莫自欺若也細數平生未至釋書以嬉畔道而奔棄於君子歸於小人者嚴父邱兄督於前良師益友策於後耳入中歲

來授徒自縛學不習則雖欲道聽塗說而言無所資行不修則身受十手十目而形無所遁心亦勞矣日以拙矣而返躬自問既覺進退失據數君之齒尤慚犬馬之年甚矣修業進德之未易言也去夏山居逐日爲記回首今日適周一期鷄肋自傷獯祭同誚祇有一節可告寸心其事伊何毋自欺也夫屋廂之間帝天如在夜課夢寐日課妻帑述之亦庸言庸行之常行之乃希賢希聖之業欲致其道各有其途儒家以主敬存其誠雜家以息心攝其慮吾以嶺嶠末學敢希寡過之蘧大夫竊以稷下之游有懷晚學之苟祭酒策駑馬以十駕惟君子有九思欲羣居而騁談不如退而自省也欲臨淵而羨魚不如退而結網也嗟嗟放心之求稍縱卽逝知恥之勇有聞斯行日記於我如影隨形我於日記如響應聲咨爾日記參前倚衡咨予小子脩辭立誠中心危者其辭枝失其守者其辭慙辭與其不忠也寧默與其謬也寧釋莢而游諸侯何國不容而自令若是已而已而先生休矣而今而後吾知勉夫癸酉蒲節後二日任初自序

## 萬年山中日記第十三冊序

在昔伯厚紀聞容竝隨筆匯羣言之淵藪垂異聞于憲章四部而外別闢町畦終老之勤賴茲汗簡爾後餘姚待訪崑山日知竝最微言時存大義有清勝國稽古名家或述經義於過庭或記讀書于東塾莫非日積月累成其山壤海流晚有湘鄉踵以常熟漢宋無擇仕學兼優則亦巍巍等身藉藉人口間雖醇疵互見殊復精力逾恆席彼遭逢豐其述造迥非枵空汴李掠影浙袁所可媲美已清代殿軍浙東越縵儒林文苑韋布素王仰挹清塵默參素業信乎空羣冀北莫之或先獨步江東誰爲之後者哉間嘗論之使趙括竭駁生材智以著兵書未出孫吳之下韋宏嗣舍著史之長以事博奕未必非吳國上選而或以臣心如市求伎未忘或以偕隱無儔專業不壹浮湛郎署躑躅路岐滋致慨於古人寧無慙於日記邪用是自序并以解嘲癸酉九月旣望任初識

### 萬年山中日記第十四冊序

予嘗觀日記于商賈者矣曰流水簿於工詞章者矣曰鉅釘錄於觀氣象者矣曰記度表又嘗察人類之日記矣曰歷史考大地之日記矣曰地層顧僅有流水簿非有術以綜覈之曷

以知商賈之盈肭也鉅釘小錄非有文以鋪綴之曷以呈詞章之靡麗也紀度成表非有函數以統馭之曷以推陰陽之變化也凡此皆及時寫定不假它人若夫歷史者人類遞嬗之蛻迹地層者大地凝結之年齡或則廣窮絕域及身難成或則上溯大荒百年爲蹵要皆由博以歸于約由變以求其通吾人之逐日爲記將爲人乎抑爲己虛爲己而爲之則所記者胥己所已知者也何吾子之不憚煩爲人而爲之則所記者率非人所必欲知者也何爲執塗人而聒之然又不見夫劇中人乎袍笏登場自呼小字舉步啓齒絃管隨之兒時觀劇以爲古之人如是如是奈何今之異于古所云也天下事之不可解大率亦如是如是耳責天下皆盡可解之事亦猶乎誤視科學爲萬能之學有一日知其不然廢然而返則又以天下無必然之是非無一當吾意可爲之事僕愚不肖不知天下尙有何等可爲之事而今天下亦無暇知此山中有此能爲役之人則以是終焉可矣日居月諸敢告斯記癸酉初冬任初自序

## 萬年山中日記第十五册序

蓋聞學有爲人與爲己人各有能有不能是以顏子雖愚不爲易地之舉以殉天下之溺漁人雖貪不爲非分之干以冀蛟龍之獲

蓋聞塵埃野馬曠息已非流水逝川晝夜不舍是以螻蛄朝菌亦有春秋伏櫪撫髀自傷遲莫

蓋聞不狂爲狂不笑不足爲道各是其一是鷄繩衆非是以孟子之滕館人疑其竊屨郭泰遇雨時人皆爲折巾

蓋聞善炫美者工臧其拙老于耕者不失農時是以李諧善用三短因癭而舉臣因謇而徐言因跛而緩步董遇善用三餘冬者歲之餘夜者日之餘陰雨者晴之餘

### 萬年山中日記第十六冊序

二旬於茲家園養拙孺人稚子白屋藜羹是亦鄉人言咨故實所居之邑裂土於明於禹貢屬揚州之分域於漢志爲揭陽之南交震澤底定厥田上上所居之民來自中土於元和著盛唐之文物於德祐衍南宋之衣冠韓廟陸祠民不忘本問其禮俗則冠昏喪祭之儀節信

而有徵稽其語言則八聲五音之古言失而在野筆路藍縷邑於岐山負耒若耜感于聚族黃雖積弱介於陳蔡之間獨以相忍遠遵江夏之訓溯其本支興於高祖三妃宮下五世其昌鳳山書院家廟在焉

太祖祠前大華局舊爲鳳山書院雍正六年立見縣志

革命軍興兵事壓境一椽之地克保弦歌俎豆之常

嶺海之濱時枉海內長者之轍忝食先德有負明時遺書在楹白雲在天曾滌生云不敢以浮夸導子弟不敢以暴棄貽父母之遺其有所進幸也其無所進終吾身而已矣敢述舊風以要嘉譽哉甲戌上元際遇自序於澄海振祖祠

## 萬年山中日記第十七册序

不事耕耨不知稼穡之艱艱也不自芟治不知心苗之蕪蔓也客歲云莫乞假南歸省墓之餘兼治小學勉能自守不役于物孳孳一月茲事又廢子輿四十已不動心我年五十方有所悟不役于物已感匪易不役于心尤覺其難凡夫名利等等先生於此更復何求獨於骨肉之間未免有情誰能遣此祭竈前日陡丁奇痛舉錫罷咽對客無言年事未終征途已始一身未了何日歸休負米爲誰廢書而嘆魂忽忽如有失行俛俛以何之欲嘔出心血耶不

有博奕者乎誰是博徒可從之游竊以奕旨可坐而隱一切得失縱暫忘情一子後先未肯罷手不必云此物雖小可以喻大但臥聽山中一葉天下已秋風滿空山心如止水莫問吾舌之尙存否姑捫我心在腔裏無甲戌立春日任初山中序記

### 萬年山中日記第十八册序

不其山下拜賜三年首宿齋中一臥驚歲問客何能曰是不能也問客何爲曰無可爲也是知其不可而爲之非斯人徒如之何其聞斯行之有日記在山中正多歲月皮裏自有春秋用數晨昏以自序記

夜如何其曉月在牖日之出兮爲天下先鄰雞膊膊重車碌碌披衣而起挹泉而漱呼奚澆砌開戶納鮮阿澗可依部婁接武蹒跚曲徑卻曲荒園兩袖清風一盃早粥於時日在隅中寅賓東作竊吹驢技濫竽鱣堂數之爲數小數也先生之志則大矣辨究毫釐推極宇宙言者袂聳聞者色飛聞所聞而來何患無君二三子見所見而去從先生者七十人謂以是爲絕學之傳吾斯之未能信姑舍是爲執鞭之士則敢問其所安人各有能有不能事有不爲

非不能者以樹木之計樹人或曰求其在我無買山之錢買硯臣本少不如人日之方中退食自公或招客而共酌或擁書而相從抵掌譏彈古今人借箸欲爲天下雄則何爲紛紛然肆殘杯之狼藉復亂書之鴻濛烏用是栖栖者旣四方兮蹙蹙復一枰兮丁東客有時而不可得道無時而不可通長嘯空山呼月出夷猶偃仰鯁鯁然計一日之難盡又奚暇哀吾生之靡窮

### 萬年山中日記第十九册序

蓋嘗與修學術通志抽讀儒林諸傳因以辨先哲修業之涂軌窺道藝之畛或矣凡一學之成科其將始也極簡一人之成材其登高也自卑浸以繼長增高不辭土壤積功致力不廢舟車終令蕞爾附庸蔚成大國明德之後遂生達人此非一朝一夕之故尤非一手一足之烈矣吾於疇人之術亦歷三十年則於日記之前不惜盈尺地循四部部居之序爲九數數理之談可乎伊昔聖門六藝不廢象數一科洎唐而算書十經已列選士之制原其作者乃命羲和誰其廣之問於商高曆象日月星辰經天而緯地廣三修四隅五臥矩以知遠苟求



其故千歲可坐而致後有作者聖人不易其言茲道若大路然由之復使知之奚止五五之開方豈復九九之賤技如有易其一字臣欲謝以千金古有存者皆國門之可縣今之建樹尤舉世所共寶竊欲修其原理定則勒成算經之書與爾雅說文並殿羣經之後焉子部百有七家學庵仲容子抄所錄一百七家宋後失傳雜家十而入九薄解文章之士空談性命之徒羣相託言神農著書明鬼惟茲論數非侈談玄德在新民功在明道其分道揚鑣也則爲形爲數爲音爲力各極其別開生面之觀其通功合作也則參天兩地窮理盡性而胥呈殊途同歸之理以究萬物之情以通天人之際可謂控名積實參伍不失者矣史書之興人文所繫雖有來軫厥賴前車渾天之儀光在東漢圓周密率明於南齊歐史早著張衡之功不待核之漢志日儒特定祖率之語本來名從主人譯借根天元之法爲東來或未免六經注我斷畢達哥拉裨販自中國則猶是公論在人慨自疇人分散鄒大失居史臣失官曆法中落縱徐文定有崛起之勢而梅徵君寡同術之儔何名山之寂寥僅傳儀徵一傳望闕里之多士誰續金匱之篇者哉嗚乎談天者摩肩稷下一指而泰山不知譁世者拾慧齊東等身而倚馬可待諸所云云異乎

吾之所聞公等碌碌所謂依人成事吾遠考西京藝文近徵美芝學府天官曆譜之鳩錄卷可盈千壽世華國之鴻業地必數輩稽之上古則如彼考之與國復如此斯乃行之者遠發揚邦國之光言之有文宏啓宇宙之秘者矣與居與稽不薄今人愛古人以佃以漁毋令造物笑我拙也甲戌初夏任初自序

## 萬年山中日記第二十冊序

論孟之書門弟子記孔孟之言及其行事已耳以後例之亦日記者流也文學之途彌延日廣乃至有假託狂者暗者鰥寡者懷春者置身非人之竟或置身蓋棺之中者無若有虛若實以心生竟隨趣成文設身處之亦日記者類也古昔師徒口耳相授周秦以降筆簡乃繁長轍釣名曲學阿世掩父書爲己出信史黷誣背師約而名成爰書具在枕中秘笈感張對客之談都下刻書竊自老儒之手僞書如落葉野草生春風徒災汗牛自同芻狗耳惟自來日記尙未有竄前人之名若假它人之手爲之者以其事本可不爲而爲之猶賢乎己所學何以自信曰吾斯之未能信躬自存錄不待弟子之傳新事出尋常無煩作家之弄斧考古

人之生卒應是賜也之賢譜一己之平生究嫌夫子自道長門無賦小序自娶云爾

### 萬年山中日記第二十一冊序

山中一雨秋思盎然遠水欲波臣心可照六旬來似年長夏駒隙悠悠五十後來日夕陽予懷渺渺自傷始滿焉知不如豈恥無聞實疾沒世加齊卿相夫子不動心否乎媿魯諸生君子知天命者也青山名士須一飲兮三百杯紅豆故人致尺素兮五千里澆其心苗之稿餽以噉蔗之甘不觀野草無名復時蘊後凋之秀漫謂籬瓜有意何長如久繫之匏無語燕泥空梁飛落老人馬齒撫髀踟躕耳甲戌聖誕黃際遇自序

### 萬年山中日記第二十二冊序

比以閉門比于坐廢妻帑南徙錐鼎東遷秋風蓴鱸故國旗鼓時用遲回能不愴恨顧念書缺有閒庭除正寬俛仰之餘嘯詠以之丹鉛狼藉若對薄書青史豕魚如掃落葉晨鷄警曉野馬流光獨策峻坡無傷逝水年不可假大未必奇心之所安非亦勝是不習女工寧當舉博士邪如此豎儒幾敗乃公事耳經儒將絕痼習難忘永戴遺賢懷我風愛焉爾甲戌中秋

後五日疇齋自序

萬年山中日記第二十三册序

齷而讀書免夏楚也少而讀書干科名也壯復讀書博祿養也今垂老而讀書何如哉人之生也耳欲聞目欲見口欲言心欲思所見局於方隅所聞囿于道聽言之辭慙思之腹儉而含飴焉鼓腹焉過焉若忘者非無懷氏之民則深於道者之所爲也吾身旣不能安於畎畝術復疏於叔孫詭遇奚從望古遙集斗室之內馳思入絃及夜未央直追千古不見來者乃見狂且幸覺昔賢如或詔我出門荆棘披籍汪洋落葉不知聞音而喜以是與世浮湛看日早晚耳甲戌秋歸疇齋自序

萬年山中日記第二十四册序

夫楚人謂乳曰穀故言釋亂爲治地之相去不必千里時之相去不必千歲同一時也而夏夷異言朔南殊制同一地也而風尙縣隔文野睽違言語道窮婁曠同慨餘杭博通古語而主講楚魯動賴舌人今代號太學生有不知周公安問斷句國殊風異自古而然人十馬四

于今爲烈非今人之獨拙亦昔人之所難中遠稱太山太守北面見絕於鄭生季長以一代大儒伏闕受書於班妹師第火薪有資口耳詩書襟帶久等弁髦卿讀爾雅不熟我以漢書下酒耳

晉書琴操傳謀初度江見蚺蛆大喜曰蟹有八足加以二螯令烹之既食吐下委頓方知非蟹謝尚曰卿讀爾雅不熟幾爲勸學死

讀群雅後記

小學政卷三至卷八子目特詳

甲戌冬至之夜任初

### 萬年山中日記第二十五册序

昔子固不以舟車廢學亭林所至載書自隨古人于學如影儼形無事非學無地非學攬予平生常在行役齟年應試已餐風塵十五計偕云經滄海年年去國歲歲依人自少而然垂老猶爾徒以負米重傷倚閭雖有辟纊慚未執屨孤羈萬里遷謫四十年此四十年間祁寒祁暑以公以私非舟卽車一歲數出旅食爲生什一以上綜而計之不下三年險阻艱難縱曰備嘗般樂怠荒敢云知免五十之年忽焉已屆閉門不得望洋瞿然及臘霜天一肩行李驚心旗鼓數響鳴鉦舟子半舊識之儔流波激新痕之恨脈脈心事獨話天寶當年軋軋機聲底事人間春水憑欄遠眺欹枕幽思難罄百斛存茲一葉焉爾小寒節後二日膠州灣新甯舟中自次疇齋

## 萬年山中日記第二十七冊序

中華民國二十四年乙亥五月十六日假館膠東暇輒治史追理舊業因作詩曰  
惟臣之先世守一經臣受父經云方五齡禮傳章句甫齟而歎父曰嗟嗟母伸估畢不琢非  
器不通非儒女往旃哉尋師而徒遭學之亂樂崩儒黜禮失其官小子何述負器委質鄙野  
越國挹彼菑畲療我荒殖所志者大所學者小唯書與數茫茫遠紹輟耕太息芸人之田曾  
是悠悠遂爾卅年料量所得兩袖清風便便私謫謂將毋同無聞非恥自欺爲恥但視昔人  
立身何似用是俛焉將至不知熹以茅葦自植藩籬羊亡牢存道大歧多以經訂經執柯伐  
柯經奧史繁子龐集汎方摭班陳備以通鑑一文之異考徧六書鐘嗚呼食謂姑徐徐清儒  
董古已云卓絕書缺有間遲予而決時得一解欲起古人古人不作敝帚自珍聲在樹間綠  
滿窗前楹書具存吾將終焉

## 不其山館日記第一冊序

今膠州國學位於青島東南隅西去海岸一里而弱三面負山山無主名或不成名詢之芻

蕘而土著之民無存焉卽青島之爲名僅見于同治十二年所刻卽墨縣志有文曰青島縣南八十里七字而已如此江山一句無我爲昔人媿之然當年萑苻盤踞出沒之虛樵漁縱斤曬網之所今則遊屐多于江鱗蠹閣櫛如立檣卽此鴟夷講武之場浸成東魯雅言之舍南山之南北山之北悠然可聞弦誦之聲東海之濱北海之濱儻有若夫豪桀之士乎聞夫朱育之對濮陽汪中之張廣陵昔之大夫旣山川之能說後之作者可數典而忘祖哉惟是退之不謫韓江無名子厚不文愚溪誰識封泰山禪梁父彼特席帝王之資書帶草不其山何莫非師儒之澤夷考其地隸卽墨近經師之居漢縣不其背勞山之脈勞山兩見逢傳論名應從主人不其爲其二名李注擷自漢紀我以東南之末學倦遊京洛而卜居雖挈史雲之甌囊書不匱因賃伯鸞之廡暇日尙多居東逾姬旦之年著錄過臣朔所誦計篇百三十太史公未自名書逐食至何時不其山假顏吾館焉爾量室以斗循牆而走不必痴百年之想而不甘弛一日之肩慙我僕夫迴君俗駕銘曰

宛彼不其東海之湄存齊孤城拒漢邊陲一戰餘威荒島濤肆雖七十城愧五百士灑葬之

風鬱爲儒宗漫山百萬厥角如崩雖以巨君不得而臣將安歸兮勞山之齋山川寂寥千載而遙乃有一士屈居鄭僑恩跡澗阿孤館幽谷三鱸爰止伊誰之屋自棄於世自封其廬王績無功顏回弗如恥彼黔驢乃頌狐父舍本逐末于林之下鬼瞰其室山壽億年斯館斯記何容心焉。

## 不其山館日記第二冊序

三月以來舟車殆半五十而後記誦愈艱偶亦屬文如臨廢井心不應口矩不從心體弱氣龐視今猶昔獨於此記必以自隨海內無君更無責我山妻畏市甘兒歷齒天涯共苦復有何人則我於君亦託忘分君之得失我能道之子桓典論士衡文賦辨析體勢如律有科彥和文心深入腠理神采膚貌繪影于聲降及桐城件類十三晚如涵芬係官吳曾祥子目及百長沙類纂施諸駢文申耆孟塗早張此論法令如毛義法名家論世論文并覘世運又如書道晉意唐法九宮說起八法彌衰入清館閣朱絲爲牢纖步登堂舉止失色法之愈密真意益淪末流苦之潰籬突矣就中書啓最盛于時述學抒心畧無礙滯家各別集集必有書追荅秣



陵憑君烏有粵若之解盈字萬餘語錄入文集高及尺梅亭類文標準四六留青成集等之優俳豈惟質文相勝爲憂直以餽羊告朔並廢若夫札記古列裨官王顧通儒爲之而顯摯甫持此代序湘鄉未開齋日記李合肥序越縵短之未知自出以今觀之信有不然紀聞命意本諸過庭日錄所知語存卜子論語惡記孔氏之徒三省發私曾顏紹之侍坐有言浴沂可詠終于鄉黨申申天天大義微言往往而在以論日記此爲大經子輿之志發諸門人亭林無徒及身論定惟我求徒難于求師利賴斯記更相師友爲勤爲惰孰得孰失不待覽者自能辦之卽論學文看日早晚失巢之鳥亡牢之羊少乏師承老誰杖叩求知於世旣恥負車自得于心豈無弊帚存茲一念庶少欺人誰有百年以是沒齒耳何悲秋草竊比老彭乙亥重九任初自序

### 不其山館日記第四冊序

維時寒重風高地荒天迴石尤飄發猿啾嘯哀露蘊晦冥秉燭于未莫來淒清凝冷飛花於崇朝未若柳絮因風天涯何處適居山陰小雪足音渺然莫笑白頭當牖之青山亦老何無

履迹待詔之東郭未歸史記東郭先生久待詔公車貧困飢寒履有上無下行雪中足盡踐地道中人笑之夫以臘祭盛時流民罷乞剛風過境驚鳥不飛

傲霜無殘菊之枝交柯危墜巢之卵而予也在外之年逾于重耳高臥斗室乃類袁安錄異傳曰大雪文餘

洛陽今身出客行見民家皆降雪出至袁安門無有行路謂安已死令人降雪入戶見安僵卧問何不  
出安曰大雪人皆饑不宜干人按後書本傳李注據汝南先賢傳文同並曰今以為賢舉為李康也門外雪深嘗侍明道于海曲適得居東宗師林鶴  
一先生之耗辛四冬

廣美洲拜先生于仙  
台門外雪深三尺五十過二感懷文舉之論書庸羨鶴斃之軺軒朱門在望晉書王恭衣鶴斃衣繞雪  
行時人謂之神仙中人敢忘兔園

之交支青鳥可明江淹與交友論隱書  
誰謂難知青鳥明之負驢背之詩情卜雞聲而起舞焉爾乙亥歲盡疇盍自叙

### 因樹山館日記第一册序

遊子輕去其鄉慨然有四方之志在陳忽思吾黨浩然與盍歸之懷去魯何止十四年亦已  
半生車馬學易敢期五十後忍令上國衣冠落日邊城蕭蕭墜葉大風永晝悠悠黃河追理  
曩從不勝逝水之感低徊來軫爰草去齊之篇我年甫冠擔簦五羊一罷計偕遂度東海羽  
毛未滿急于自售津館五載方及三十薄遊江漢一臥十年京雒之館最爲祭酒翱翔館閣  
緇塵素衣葆我初衷卒應齊聘志業未就而吾年將五十矣偶愛清勝遂栖山下久無遠志  
未卜當歸阿澗棲遲以避世弋閉門掃軌往往彌月不見一士可與共學發爲學記達百萬

言汰礫披沙或終無得然浪遊半世孤館六年悉索做賦盡在是矣稷下之人談者數萬急功牧馬挾榮亡羊食祿此邦羞稱王績僅一亞父亦無能爲一夕數驚相呼伯有或致寇至如居武城百爾君子雄雉于飛被髮伊川若敖鬼餒柱下史守杞室嫠憂自有百年不可一日去來今古高密安邱鄭鄉匪遙于門在望非畧世尙友安能少日此居乎江南草長春水濤生折柬故人熾舟門吏誰謂宋河之廣毋令謂秦無人約堅十年杭輕一葦池北舊館履兀可懷灑西高齋草堂未圯曝麥遲誦經之侶歷齒速投耒之歸一經可終餘年百錢亦支一日采藥賣卜昔賢不羞柴車羸牛老子與之名山其人付之不可知者而已不其之館只在此中因樹爲屋請自隗始

### 因樹山館日記第二冊序

先人之做廬無恙南中之景物何如在昔哀賦江南不無危苦節持塞北誰與爲歡歸與有懷浩然而決正桑麻之春及遇村尢如舊識何待秋風方思尊鱸坐看落日不知早晚早與晚其代序春九十而已度洛陽花事理詠何人山寺鐘聲瓦釜亂之一例春土千逝迴波只

在山中先生安往粵秀之秀可餐兮爲君造閉門之軌荔枝之枝可折兮無人知一騎之塵

冢傍要離先賃伯鸞之廡言經舊苑有弔守貞之文古公愚有文表明南園詩社女侍張麗人墓溯榕水於望溪秋登東山而

思魯叔明假館東山汝墳賡豚魚之格陳遠夫等改魚類象胥來萬國之同羅節若台英詳二十年亦有二絕王瞻五噫梁婦何行璿棋藝幾突前人仇

傑稱最第唯奕秋之爲聽時從黃松軒遊未逢羿之彎弓及門張雷季劉輩時相過從善數聞諸大夫數理系同人劉俊賢袁武列柳金田苦譯言無日不會談天高於騶

衍門人張子春以天文名家五步之內北郭買春林本喬每少結伴信步一斗最歡西園載酒羅節若朱謙之張孫衡連夕招飲西園訂期裹東坡之腹增城鄒君約五

月缺荔枝執簡徵南史之編廣東通志館訂聘有年來速稿草時溫丹銘在館斯並越王臺邊畸人勝侶賈珠潮長獨士孤蹤者也孝先

眠罷還讀我書嗟來食餘存爲私記已耳丙子莫春任初自序

### 因樹山館日記第三冊序

自壬申中夏癸甲乙丙四年之間所存日記凡三十有四冊日凡有記咸能自序何許子之不憚煩此夫子之自道也卑卑者何足道哉好事者薄而觀之或謂其四年如一日或謂其一日如四年聞前之說吾將勉焉聞後之說女安之乎長日如年重門卻客齋冷于寺樹禿如僧時有小鳥倦飛依人間以蟬聲點綴清夏室人劍挈三五小樹根踞坐聽書聲風聲

不問其辭論不也山館主人醉餘睡足瓊瑣自記從吾所好云剛何以四年如一日也五嶽歸來四十已邁始辦津逮彌畏棟樑月旦論人敢學汝南許劭鄉里于我猶是吳下阿蒙卒以治書蒐裘可營溷于授徒廉隅自勵燠寒休暇升斗餘糈文史三餘妻孥一飽與遊率在陋巷課耕惟卜陰姓亦有剛日柔日之分要皆莫究莫殫之業吾烏知其今日之無以殊于昨日而不敢不以是終其身焉四年云乎哉然未甘安于一日如四年也作息游處如日之恒進修問學如月之升富有之謂大業日新之謂盛德七部六經先民饋人以菽麥大象小數大塊假我以文章振愚公移山之智飫饑鼠飽河之量惟日不足與物相忘雖微至一飲一啄必恥一物不知則羣雅釋物諸篇日必親焉山川行役詢及一丘一壑則山經水經二書動必諮焉記言記事自爲起居之注則釋詞訓詁之學慚不逮焉雕蟲小技爲之猶賢乎已則石經象賦之作時猶及焉若夫咏物之詞傷逝之什春蠶秋草非無病之呻鸚鵡鴟鴞著刺譏之隱君子或有取焉如謂處士乃謗國之稱著書供覆瓿之具是則非予之所知也夫丙子五月任初倚樹自序

## 因樹山館日記第四冊序

半生事業百不足道未甃受書垂老茫然授徒爲生燕楚豫魯息影羊館畧有可言庚戌迄今傳經象數禩逾二紀徒號三千小數之技等諸奕人徒之置師亦如奕棋或則以封子猶泝澗未聞大道吾豈匏瓜結念辭華比事秋草有懷倚馬溷跡雕蟲敢云事出沈思義歸翰藻時或傳之簡牘事異篇章藩溷未充口碑已實播諸好事近于嘏巫食薦食芻口之於味善譌善謳人孰無情嶺外梅開粵嶠荔熟臣心如水吾道遂南十種算經古文一卷六書雅詁斗室千秋斷金友生捫槃爲日文衰是懼嫂溺誰援分坐皋比標名駢體敢辭不舞維梓與桑彥和文心雕龍獨擅商隱史側祭獮何譏一日之長居吾語女一字之改安則爲之得失在心酸醎孰共以待來者敢告僕夫丙子中秋任初自序

## 因樹山館日記第五冊序

舞勺倍經亦四十載珥筆學記畧百萬言輒輟所經窮日之出入籌策所布鑿幽乎乾坤祭酒三推于洛洛之間退而放乎牂柯之下乃啓篋而視何爲傳書庭笥之思彌負生我狂生

不胥時而落梧鼠以五技而窮無本之學直禽犢耳昔者戲語季剛謂君輩日以音韻訓詁課士而不課之讀經試問一音之變遷一義之正俗將何資而取決焉季剛旋又檄予曰子自向國外治絕業予終不爲子低首也此雖爲友朋相狎相諠之私要猶友直友諒之公省記曩言幾爲淚墮宿草不哭後死難誣爾乃隴畔鋤經尊前讐漢微言絕詁贊歎窮日月江河景行行止拾柱下苦縣之墜緒羞窮經致用之虛聲凡夫蘭陵奇字陽翟春秋侍中舊文司農雅訓卽洒掃應對之細悉禮樂名教之存挾策補牢自公退食晨窗灑日親蟬簡之衣魚落日寒衾擁兔園而祭獺乙乙思緒丁丁棋聲時起伏於水涘巖阿捫蘿撥雲往往在也丙子立冬又五日因樹館主人狩于長湓之野

### 因樹山館日記第六冊序

試望平原輕煙籠樹蹏蹏夕陽迷離老圃莫鷗倦飛鷺鳥斂羽滄浪罷譎湘靈停鼓幾人衣錦還鄉何處一坏之土靈落古人淒其山雨鐙影雨聲相望終古筓痕猶新青氈早破展卷溫經如追忘者亦過伯魚之庭敢效孝先之臥補南陔之逸詩於上宮之牖下琅琅經韻漫

漫長夜臘春宵杵曖村遙和古稱儒學司徒是屬設教敦化迆風漸俗胄子誦書齊民知學  
萬古江河終食菽粟漢家宰備經儒名宿朝有疑事言必經術翁子貧家毋弛擔薪之誦東  
海德門並解曳泥之讀嗟予好古生苦晚卽今虎賁亦典刑淨洗雒塵鄭公鄉駐車問字楊  
子亭陵谷有萬變綱維祇一經昏黃風亦黑鐘聲賴寸莛東南儒術殷大輅承塵不廢做簞  
篲底事農鷄鳴不已眼中大宙終冥冥

### 因樹山館日記第十九册序

新都燕徙故國烏唬鸚駒在門蠨蛸在戶分異三年謫宦乃爾栖遲時亦一舸蒼茫靡所投  
止嘆至尊幸蜀沒柰何天寶宮人自師摯適齊更休問梁園賓客其間旦暮聞何物鼃蚋營  
營瓦釜鳴格桀輟輟不離飛鳥嘔啞啁哳甚於巴人以備歷九州之身而卒難立錐之託一  
寒至此須賈尙念故人十載不除至忠終成蔽路開府北羈猶拜滕王之叙集杜陵西去更  
無節度之餽遺解嘲乏文進學罷解賓戲不答僕誚奚辭李愛伯有  
答僕誚文會南學東遷招徠從亡之客  
爰西行北粵又是逆旅之人吾觀先生何爲危城之中竊知公子早有四方之志惠州本非



天上蘇華中語長安近於日邊何嶮阻之備嘗實懷安之名敗乃脂車轄載裹餵帳走馬來朝刺舟

宵夜亦問津於沮溺擡指路之牧童乞火僧寮受殮盃嬾夜行晝伏遇飢鷹之退飛微服絕

糧遭野人之與塊每念王室敢憚驅馳深謝斗杓照人行役所經轍迹東坡此地卽西湖言

溯曲江南海有人瞻北斗朝雲墓下嗤絳桃昌黎侍姬之不果來風采樓前曲江邑治有文獻公祠祠前風采樓額署後學陳獻章書拜白沙

而不忍去武水清且漣猗庾領險殆絕兮深山大澤實產龍地去邠踰梁至于亶父設帳興

學帛冠茆茨卑宮日夫差女忌越王之殺女父乎觀從者而知公子必反其國也同指山河

視茲息壤庚辰立冬任初自叙

晚吳子春趙太侔楊金甫何仙槎夫嬾來飲於此粵厨鄉味頗博時譽魯酒滲冰心脾羽化

飯後同至蔣夢麟祭酒處蔣君謂余比在公園晤一賣瓜老者爲述彼之來青島也山尙童

童且自云識余言之歷歷因憶及大學道旁蟠蟠一老予亦息肩綠蔭與話桑麻雖曾班荆

却未投刺而彼已心識矣酒逢名士飲禮愛野人真今夕何夕見此良人入夜濤聲淒厲挈

兒輩駕車沿大學路直下南折過匯泉山靜如醉臥海鳴似陷陣車駛如飛燈燿欲墜憂然

而止炮臺半嶼盡處也公瑾當年雄姿英發安所得銅箏鐵板爲唱大江東去哉旋下車穿徑據石濯纓萬里海天廓然無物以茲之樂何異登仙銀河高橫乃以車返縱御者之所如歷亂山而闐然茂草豐林僅可辨徑一環百曲車行若梭夜半遊山惟恐不遽方之古人未見著錄假使車御陡然失職旣涂轍之不辨將馬首之安瞻忽望羣火明滅驟訝飛螢御者告余曰此臺東鎮也然則車行郊外已數十里矣急迴俗士駕爲君斂浪迹翻然就寢日影在窗

萬年山中日記二十一年七月二十六日

今日溫度不加高而潮熱實甚揮汗如雨上午赴校辦公絜仲往青島醫院並趨慰季超歸來爲之廢讀檢出庚午年所爲家慈登壽八十有六徵言畧一文督平兒繕寫一通託一多帶詣燕城請師曾六弟寅恪爲遺像贊署伯巖先生欸晚趙少侯祖一多之道實秋太侔澤丞及予作陪金甫同赴席卽歸訂定聘李宏齋王恒守事歸校舍十時矣熱尙未解兒輩欲往觀水族館乃共驅海濱公園有亭翼然畫棟朱欄逼真大內晦日亥正潮方怒長斷崖懸石搏激有聲遵海濱而行上下低徊俯焉拾級仰焉攀巢新館在望星電爭輝而館門將閉

矣以刺詣之優待有加蛇行曲巷之中蠖屈長衡之徑遊魚可數伏甲不飛容與漾漪別有天地斯時遊者依稀龍潛蠕動欲抱珊瑚而長終矣甫出洞門涼風習習披襟當之真不知人間天上今夕何年

萬年山中日記二十一年八月一日

連夕婁以觀奕廢學放情于博奕之趣畢命於花鳥之妍勞瘁既同歲月共盡青市海浴成風夷歌達旦大學之道世少同情先生之風時遭吠日又復高談聲律枕志形羣斯所謂陳鐘鼓於海瀕炫芾冕於僂國者矣

萬年山中日記二十一年九月二十二日

三月已來一室反鍵青燈有味遊屐無心蠖屈不申龍潛勿用業不加進力不綜攝雖未減東陽之帶圈而已元潘岳之病髮

萬年山中日記二十一年九月二十五日

意興飄蕭風情零落前爲疊均後爲雙聲搖曳之音敲鏗之節於此寄焉詩箋云聲成文者宮商上下相應心聲之言卽天籟之所託也太炎先生壬子在金挽諸烈士聯云羣盜鼠竊狗偷死者不瞑目此地龍蟠虎踞古人之虛言語本三國志諸葛亮曰鍾山龍蟠金陵虎踞千古帝王之都也余十一年自美洲還廣州道中所見紀以一聯曰屠狗起家廁鼠如廩鬪

雞淮右走馬章臺譏諸將也意實本章師

萬年山中日記二十一年九月二十八日

小舟一鐙破匝數卷主人之面瘦如削瓜侍姬之鬢亂於歷稞倚身一襪入霏欲斑傳家片  
瓊與蠹俱徙病僕偻背傭婢出匈庚橫箬柴丁倒益盎折足之几半罍積塵缺耳之鐙尙餘  
焦飯風吹帷而皆裂月穿簾而悉空君子固窮道旁皆歎鍾馗徙宅止有槭窬楊朴壓車半  
以雞犬儻有好事傳之丹青風彼將來永爲佳話

萬年山中日記二十一年十月八日

午爲正坤逸峯及兒輩講國學概畧以文周孔孟班馬左莊葛陸范馬周程朱張韓柳歐蘇  
李杜蘇黃許鄭杜馬顧秦姚王三十二言爲立言程序其部類爲經史子集其分科爲政事  
德行詩文掌故考據其朝代爲周漢唐宋清漢唐之間爲六朝詞章特感而不關典章文物  
之大要唐宋之間爲後五代年代既促共五十年尤無聞於壇坫雅頌之林藉梅四六黃話論列作家五卷至元而止元亦僅錄聞復姚燾王傑袁桐康集劉瓛數人  
而獨異乎宋清之間一六四七至一七四七改玉三朝載祀四百而竊倣鄙儻凡百無稱縱或以元之詞曲明  
之書畫亦極神州藝術之觀然藝術之於學術究非五雀六燕之比君子斷代以觀世變又  
知上下二千年餘年間一部文化史之隆替與歐西不乏升降相若之處雖欲不委之爲運

數而不可得也

三十二人中以姚之重輩為最稱得生自言圖藩之粗知文章由姚先生啓之也故以殿焉

尊客論宋明文家可節摭資證者

越溪堂四記十册五十四日纂

如云宋文

最高者歐會王三家然已不及唐之韓氏歐王毗於柳子厚曾毗於李習之蘇氏老泉最勝

東坡次之然僅毗於杜樊川

杜杜

而筆力且不逮焉子由則又次矣遺山牧庵

元姚

皆學韓而不

得其意道園

元康

學歐而不得其神此固氣運為之明文之病非特時文之為害也蓋始之叔

為者潛谿華川正學三家皆起於草茅習為迂濶之論不知經術其違已不能正改其後談

道學者以語錄為文其病僂沿館閣者以官樣為文其病霸誇風流者以小說為文其病俚

習場屋者以帖括為文其病陋明士文章如然犀矣

萬年山中日記二十一年十月九日

夜來秋風蕭槭殊甚袷衣猶薄出戶負暄一片天心孤帆櫓影挹茲高爽陟彼岵岡既無倚

閭為誰負米終鮮兄弟安插茱萸遠聞野童引吭聽譙樓倒板一闋如聞擣衣聲急返讀書

處

萬年山中日記二十一年十一月八日

昨日覆閱完越縵堂日記五十一册竟其文篇一一校存之詩詞概從割愛聯語則擇尤迮

錄其論小學經學不少獨到之處間刺數則俾資啓發閱書所記尤具隻眼時並鈔錄便資

楷模至于史學掌故自媿所知太少無從評隲愛伯間亦畧治象數自無足論其憂時感事  
雖心愛國而所見實不高吾儕以專治數學之人處身五十年之後持今衡古不能謂能得  
其平要之愛伯文章典麗哀豔稍遜容甫格調一籌而已北江季述未之或先也若論學與  
識則仍爲一事吾終以爲愛伯若能屏絕功名之念澹泊妻孥之累其所造當更有不止此  
者然其所成就者已有如此舉世誦習之徒乃至不克舉其名字沒世之稱若或斬之斯又  
事之不平者矣

萬年山中日記二十一年十一月十三日

辰中起牀朝陽滿几料檢亂案出挹清光器兒隨行爲示清代學派分類大較亂山枯籜氣  
字蟬深野鳥繞枝聞聲遠遁傷我孤立方逃荒阿遇此無情距人千里振衣長歎歸倚南窗

開卷橫陳改從北面

萬年山中日記二十一年十一月二十七日

閱畏廬論文閩縣林紓琴南著彥和文心千載獨步過庭書譜三折其肱緬彼徽音未聞嗣  
響豈考城之才盡亦邯鄲之鶴學與會稽通義安吳藝舟時可解臣要非擊掌侯宦晚出倡  
爲文談婁名涵芬意追寶晉雖非善戰亦負攻堅摧朽之才却好談兵饒具知彼知己之妙

畏廬此作更後十年金鍼度人匠心自運信能公文章於天下證得失於古今風茲將來有裨初學顧章包之學雜其倣也夸吳林之才弱其倣也拘吾儒有事詩書盱衡事理當養其氣以迎艱鉅之來博其識以究天人之變與其姝姝自悅守一先生之言毋寧恢恢其儀克備萬物於我若論隘與不恭君子不爲然與不恭也寧隘與其夸也寧拘耳是則畏廬所論又大有可探討者在也書首述旨文章恐終難出藝術範圍必謂爲聖賢之所心傳宇宙之所綱常說來說去不出文以之窠臼恐論者未易以爲知言耳次流別論曰賦謂賦者鋪也鋪采摛文體物寓志也曰頌曰讚謂頌者敷寫似賦而不入華侈之區敬慎如銘而異乎規戒之域讚者約舉以盡情昭灼以送文銘箴謂箴全禦過故文資確切銘兼褒讚故體貴弘潤陳義必高選言必精賦色必古結響必騫如此遣詞頗具神解曰誄曰碑誄者累也累其德行旌之不朽也碑者埤也上古帝皇紀號封禪樹石埤岳故曰碑也今人之製哀辭者蓋誄之變體也又謂哀辭哀爲言依也悲實依心故曰哀也曰史傳謂傳之爲言轉也引實齊文史通義曰經禮二戴之記各傳其說附經而行雖謂之傳可也其後支分派別至於近代

始以錄人物區爲之傳叙事蹟者區爲之記實則化編年列傳成正史之傳體其例實創自史遷而劉彥和慮其事遠則同異難密事積則畧訖易疏斯固總會之爲難也

萬年山中日記二十一年十二月二日

連夕與怡孫叔明澤丞諸友推論學術世變相關之理予謂凡百學問清人過於明人而書事總是清人寫不過明人諸友均曰氣節不及之也漢學家之治學也誠云得法其立志亦甚苦究竟章句之儒難裨國是觀夫有明之亡上有殉國之君野遍死之民有清中興倚爲柢柱者率多理學之儒宇內人安賴以幹旋者亦數十載今世則何如哉撫舷擊棹感不絕於予心輒憶及之君子於此以覘世變也

萬年山中日記二十二年三月三十日

午子春繹言宿中國飯店來電邀共飯方自西湖歸來行將南旋也卽席口拈七言一律贈之江城羊石兩西東白下春深一葦通各自中年憐意氣邗堪此別又飄蓬勞勞歇浦風塵侶落落嶺東老倒翁與子重要偕隱約酒闌人散月明中

萬年山中日記二十二年四月十日

午飲微醺歇睡片刻三時奮可思敬祥人同車駛二十里而弱抵龍華寺蓋唐刹也居民聚鎮以寺得名金尊法寶備受皈依暮鼓晨鐘發人深省藏經閣備空傳梵呪之音羅漢殿祀



非復莊嚴之舊矣出寺迂折田畔入韋園園爲韋氏墓廬有司啓閉者叩之乃得其門古柏參天嫩茵席地幽通曲徑流繞一邱紅葉當堦皆繞春色隔離黃犬亦是知音都自塵市中來到此盡消烟火氣爲問沮溺而後幾人復與木石居繞園三匝衣履皆仙引吭一歌鳥獸率舞崦嵫日暮偃蹇策歸拾貝折枝各有幽趣車塵轍迹幾遍滬西予往來滬濱已三十年而西行未至此也特記之以諗同遊者

萬年山中日記二十二年四月十二日

爲講演晨獨步花園兀坐凝想授微分幾何學二課已晌午矣翻纂詰各書午飯後曾省之駕車偕杜毅伯劉仲熙來迓共往沙子口看梨花巖阿山麓皆作銀色淡粧素服別饒風情車行一時許抵沙子口有大學海濱生物研究所在焉省之備茶餅之屬盛意款待短簷矮屋可以避囂怒潮淨灘門前卽是漁舟蟻集爲數盈千魚鰕鱗陳賤不論賈揖舟子而談話不知秦漢慨猛虎之苛政安問狐狸斂重征煩自謂生財有道威尊命賤安知埋骨何山漁人偶聚僅成小集戶不滿百地皆無賈行不旋踵一覽無餘而治亂興亡之感奔轅懷來夕陽在山廢然而返

萬年山中日記二十二年四月二十九日

晨起窗櫺水珠纍纍而下疑春雨也開戶視之方知重霧壓境密雲翳空指點春深心愁花落及今憑弔或有餘妍復偕保衡老入花叢落紅粉披墜英凌亂矣隔籬桃花相映酒帘高搖點綴盛時自怯衣薄歸檢殘匱空憶前塵

萬年山中日記二十二年四月三十日

梨洲黃氏論宋元二季人物以爲皆天地之元氣全謝山九靈先生山房記彖曰嗚乎古來喪亂人才之盛莫如季宋不必有軍師國邑之人卽以下僚韋布皆能礪不仕二姓之節然此則宋人三百年來尊賢養士之報也元之立國甚淺崇儒之政無聞而其亡也一行傳中纍纍相望是豈元之有以致之抑亦宋人之流風善俗歷五世而未斬於以爲天地扶之元氣歟實發梨洲之論而光大之盪胸歸來清氣長存袍笏空山古賢如見

萬年山中日記二十二年五月七日

未卯而興更衣出郭近雨三日澗溝又溢孤村封壟出沒潢池東方甫明隱約僅辨列島遠嶼乃在田間洵海國之奇觀郭門之美望也沿堤而東諸小子躍隨里許心會鴨鵝之入水多識草木之小名閣閣蛤鼃采采茅苴故天之生物厚矣我生之觀物澄然看殘塵市之洋場彌愛嶺南之鄉味褐衣野老猶是三代之民牛背牧童勿問相公安往田荒皆治畔隘莫

爭何必尋黃石高蹤卽此是青山勝地矣南國之化油然北門之管無恙維舟亭際倉沮祠前思古無窮瞻望弗及負暄入郭荅訪隱夔一老幡幡載言晏晏烹茶松下解渴歸來不其山館

日記二十四年八月二日

上日課題爲代友人覆書器兒有句云負笈經年此番歸去想高堂茂萱之蔭弟妹竹馬之迎話別後之滄桑問北來之車笠數句尙見思路惟皆不能寫出代字偶爲綴尾云特恐阻道且長致書未達用敢託君知我借箸而籌昔淵明有自祭之文是真達者仲言致佳書與婦乃爲衡山假君妙文答客之難洵乎聚千里于一室得同心之二人何必對影而成三茲乃無偶而非獨人之相知貴相知心知君之心莫如君矣努力加餐當前卽是率復不宣不其

山館日記八月十九日

小雨甘霖未孚喁喁然者衆矣及見湘鄉諸老者言公每於已視事接賓客時一身應理之事殆已理畢予自竄逐媿於賃春膏火不修黎明卽起駑駘無似投筆傍徨輒至禺中百廢未舉一旬休沐過者盈門矣午踐子春伉儷之約躋彼高齋有酒盈尊殺雞燔肉以介眉壽

生受隆情爲之放懷一斗亦醉樊將軍起自屠狗生啖猶豪廉信平奮而據鞍伏櫪爲恥亦江湖之載酒閒話揚州數絲竹於中年永懷謝傅興之所寄亦無必讀之書逝者如斯淘盡幾多人物滄江一臥世上千年翁仲笑人銅駝入洛看今夜酒醒何處也更不如今還又

山館日記三十年六月八日

是日先大夫百歲冥壽兒子家器稟請徵顛知友嘉言如揭陽姚氏述德徵言例遭國大故蒙塵於外同丁令之遼鶴傷少卿之雙鳧多少樓臺烟雨中一例草木城春後空倚思親之操久食誓墓之言自比棘人何心亂世惟晏子楹書之半在顏氏家訓之具存坟雖關河累年端憂莫齒猶冀禮堂春永報國日長并補稚存鐙影之圖作士衡祖德之賦耳興言咎錄彌負析薪訂墜抱遺至車殆馬瘡而始迫矣乎生我之愛益以嚴師口授羣經窗寒十載自出受傳稍接通人東西二儒尤深私淑堂名越縵誕降會稽數可以羣發於德李並與先子同年虎賁贊歎鉤稽畢生父事其有所進齋也無所進終吾身而已矣子山家世自等龍門爾爲太史毋忘吾所論著矣傷哉

因樹山館日記三十年六月十六日

## 四十自序

丁卯歲除之日客游武昌楚雪乍暉江雲已夕悲哉日月逝於上體魄衰於下素冠忽其再  
棋黝廬設於傳舍犬馬之年眴已四十枌榆之里隔以三千塵帙數卷親于妻孥棘童三尺  
禮若賓友噤關對燭默然以思遠覽梁代劉子自序之作近感江都汪生繼述之文爰綜我  
生踵陳其畧僕少懷忼慨長際時艱累草賈生之書常讀范滂之傳而請纓無路諧價是聞  
附相如之貲郎染崔烈之銅臭爲常何作奏不問馬周聞劉蕡被彈遂阻李邕方麴障面常  
避朝貴薄笨生角不識曹司此其可悲一也早承義方偏被慈愛而百藥勝衣大母先背一  
經畢業嚴親告殂東眷大椿閔孤孫之獨秀北堂諼草憂門子之多災學仕遭以不成喪禍  
慘其恥及桐棺三寸久積曼卿之喪壘甕百品遂瞑介推之母此其可悲二也任昉遺孤厥  
有四人袁耽嫁妹常擇三壻而倭子善病阿買別祧叔也早亡存者惟兩屢灼西頭之艾莫  
分北舍之租竹筍辦莊訐訐牙郎之絹麥孟野祭纍纍殤子之墳此其可悲三也德非許允  
配以孫恒牛衣夜寒乏垂淚之慰鮭單朝設絕舉按之歡乃至郡聞勃谿室無傾視雖齊醮

於卅歲實塊處者卅年朝雉之曲將終莫黜之徵尙杳此其可悲四也自預結納參伍華流每遇孤寒尤爲道地而坐席尙溫太行已阻解驂所濟跬步卽忘致書百函莫命報於齡石過人一飯卽仰面於蕭韶甚至葭葦之親忽操戈以入室隸附之託或投石於陷坑蚩駘化爲虎豺蘭艾悉成荆棘此其可悲五也凡此五悲益以五窮乃若性好典墳頗勤購讀而仲任少賤閱市爲生祖珽長貧竊書遭辱速成千卷之積遽罹一炬之災蹕鴟誤文校讐以肥飽蠹殘冊摹娑獸生蕩蕩帝門無皇甫十車之借荒荒福地吝張華一夢之游其窮一也山水之癖夙具勝懷少長越中益深栖託而秦望之花千丈邪谿之雲百重帆策缺供巖壑多阻隸事遠役總歷窮途香山碧雲蒼翠接乎寤寐焦嶼浮玉風雨迷其飄檣采皋亭之桃懷然空腹炤惠泉之鏡黯絕塵顏四瀆粗涉其三五嶽未登其一屢傳誰華一束分寫沅江之圖天台佛場負此證生之地牛渚怪窟過以運租之船時或馬卿倦游令威暫返勞生多感四顧渺歡指青山以送愁望綠浦而寫恨經年賃廡對當門之臥龍五日登高冠生平之望海腰脚已軟煙霞久虛其窮二也田園之興以比息柯雞黍之儲以營伏臘而負郭陋巷燬

於赤眉下 瘠田歛於烏羸白楊多乎花草黃獨以當貲糧廉吏子孫竟絕一絹之橘舊家  
井里并刊獨木之桐至使垂白臨終齋恨雨風之庇先靈求食不知饋餒之方渚北屢逢夜  
卽迷夫井竈郭西故隱夢猶繞其戶庭饜野父之瓜壺擾比鄰之鴉鶻栽梨補杏空繙種樹  
之書課稼植援絕羨負暄之叟其窮三也少勤著作服膺儒先自喜文章不居人後而子雲  
口吃爭蚊其草元賈逵頭長共擾其問字一篇賦出便擬蠟車十志書成競將投溷辱江公  
於坐上見輕昨莫之兒處黃祖之腹中難望俳優之養其窮四也十旬九病一日半殮革帶  
量腰孔距踰尺小冠宜首廣僅盈規行函積其方書藥煙交乎舊帳涉夏則氣息不續涉冬  
而肢體皆冰幼卽憂生今爲己壽趙苞歐血傳者以爲毀亡山松行歌道中疑其虞殯而况  
謝莊家世本乏高年范雲岷徵難期強仕每節巾以待盡幾叩刀而自裁其窮五也加以出  
處乖違笑嘖觸忤受里魁之辱甯止李陽望縣令之塵幾收杜竺陳留小吏名士懸其重輕  
桓東少年經師由其進退國飲狂水謂回臭而跣香土習謗書易牛頭而馬脯夷清流於溷  
歲誣孤松以蘧蔭卻兵力之昏以爲怙勢續湔上之祀乃曰利財萬蟻聚攻千鴟一噪死灰

既積尚溺以旋重淵久湛更弁以土甚至結嬾瓚之社亦被挪揄闖里髡之筵或遭委頓一言甫接已覺失歡旬月詣人猶虞生厭冥冥鴻鵠之景黓黓鬼魅之聲剝牀無膚燒城有舌雖由人忌實曰天刑嗟乎厥之鷄栖不越卑枝偃鼠之飲惟求滿腹僕也忝踰王長史之生年竊比袁吳郡之再造數九京之知舊倍于生存合三族之輩行多爲第畜憂患予立志業盡空今者寇盜漸平東南暫定地寬可隱大醉或醒但願回枯桐以寸春煦頰鱗以微沫逢郭代公于傾蓋先隴畢成荷巖僕射之寄資草堂竟就種稻十畝環竹一籬梅港水田收魚菱以供祭湖塘山市賦櫻筍以治生課蓬頭之阿宜擁椎髻之如願時廬項里之寺閒過光相之宗章服偶披告漁樵以曾仕箸書儻就俟朝廷之下求論定其人或有百世所冀沒齒無忝二親黃檗口含長言當哭聊以告哀先祖抒示親知非待挈于古人實求諒于來哲文之工拙不暇詳焉

## 黃松石傳

有清之季澄海有黃松石者海瀕之畸人也松石其字一名曰李人以狂李呼之亦不爲忤



於際遇爲族冑生不干祿不治生產好酒好客好義尤好石有客必酒無客亦酒無客則路人皆可客酒不備則室中長物皆酒券不繼則及所御之物而興益酣酒益豪客或驚而却走則紵臂裂裾不聽且怒目及之彼其意謂四海之內無不可友無不可友而酒之也頗聚書要不必讀頗重宗法要不必皆協于禮嘗與先子力成高祖之廟廟成三十年未嘗馨耍展拜焉邑中貴人巨室於松石何有哉以是而狂益著產益潰客亦稍稍散矣而魑結奉帚蓬門自埽葛衣雖滂花徑不塵勾者勾於門評耶乞食松石其耶之也則反唇曰我將乞汝之食耳勾者曰我乞食者也則更忿然曰夫又誰限人而不可乞食耶方遇盛明時彼其才卒無所表見人莫知其胸中蘊抱者何物而以抗讎不平若此所居廬以聚石有聲大小幾數百顆石罅滿植青草作古松盤石狀其滋漑也非得雨水則立槁雨水不可常得計必多方淳之澆之時灌之役不能有一晨一夕之閒焉樂此不疲者數十年其如何獲茲石也有躬負之百數十里之外者入室它人茂草已鞠彼究非狂寧不前知好貨好屐有不可強同者耳晚歲以來葬其親之故杖屨荒山冀營安宅往往數月不知去所終乃犯吾家之不韙

強委諸祖塋之側雖以及老之年躬受先子之杖而甘如兒笞不見懟色以爲親受之也論者不得卒目之爲狂生斯亦世之畸人矣夫

### 國立中央大學教授蘄春黃君墓碑

夫儒亂法而武犯禁二者皆譏振學術以援天下斯人安往是以行名不載於儒墨賈許世謂無文章匹夫稱賢而不彰猶史公之所甚恨學士畸節而失傳寧非爲友者之奇恥乎以余所友楚人黃君者諱侃字季剛世承孝友之風系出文節之後蜚聲江夏著籍蘄春至君考諱雲鵠者官四川鹽茶道署按察使晚主江甯尊經書院以學行顯於世母周太夫人君子諸黃爲晚出貢少翁犬馬之齒老蚌有珠鄭小同丁卯日生手文似已辨之無于未啐百數不差讀漢書於雨中五日畧徧顧厚于天者吝於人豐於才者嗇于遇雖丹山萬里雛鳳聲清而陳思七步豆萁然急於君公誦詩之歲丁令伯見背之哀年十三歲而按察公卒桓寬樸學不受財物之詒康成單家會無紱冕之緒謂駢枝爲無用苦蔗境之未甘孤孽餘生卷菴未死廉吏之子行負薪而誰憐小人有母發楹書而俱在孝經在手文選從頭燈影一

檠機絲千匝漁夫望火以卜日野父聞聲而負鋤嘉讀未燒之書分延半耕之緒久矣傳其母教蔚爲口碑此一時也時張之洞開府武昌以興學弋天下士君遂入選東渡鴻飛冥冥依餘杭章先生門下陟彼岵兮予季行役者萬里吾道東矣日夜尋誦者三年蓋扶風之學薪未盡而火已傳而愛日之暉昏甫黃而蔭已失斯則譜寒泉之什莫慰劬勞聆攀柏之號感哀行路者矣屬以邦家多難儒效日竄志士扼腕俠豪亡命君秉三戶亡秦之志張九世復仇之徽部署遺黎陰結豪士歲時伏臘猶奉故國之衣冠袍笏空山不戴新朝之天日魯先生東海寧蹈帝不可秦臧射陽操敵而盟淚繼以血如崩厥角請看今日之域中共舉義旗咸惟公子之馬首蓋當日皖鄂之交無人不知有黃十公子者也此又一時也已而清祚告終乾綱不立學之旣喪國乃真亡誰憂杞國之天揮返虞淵之日強與兵子共語拂衣者不特劉巴號率諸侯攻秦洩冠而踞見酈子君不忍視天下之皆溺獨毅然爲舉世所不爲承國脈家學之源守尊聞行知之說衍東海召陵之業于國學鄉校之間陳第已來聲類至君而寫定顧絳而後道統之重有傳人餘事以作詩人一生恥爲文士而吉光片羽落在人

間漱石枕流傳諸史冊亦足以彰獨至之行慰求志之榮矣比年築宅鍾山鬻文日下棲魂

經禮偶影妻帑自謂逃命秦隄藏書魯壁君卒四致予書中語而時悲青家旅雁蓬山巨鼇君臨歿前二日登高詩語矜秘羽

毛淒涼身世餘杭章先生趣之曰人輕著書妄也子重著書吝也妄不智吝不仁則應之曰

年五十當著紙筆矣嗚呼三絕韋編今始知命初裁黃絹正好著書章先生書君五十語意乃於大盜移國

之年乙亥登高之日剛風過處猶振哀音落帽歸來尙饒雲氣而心期中酒造物不仁刀圭

無靈文星永墜嗚呼哀哉君生于光緒丙戌十有二年歿于民國二十四年十月八日年甫

五十也卒之翌月國民政府特褒之明令下稱君學識淵邃性行高潔信無盜詞矣并交湖

北省政府妥爲安葬用示政府軫念賢勞之至意云尋覽遺族報書書卷之外畧無餘財山

木所資一由詔葬從茲鼓角山下書帶草生鈇鉞水邊三鱣魚躍盈尺片石特書萬丈之名

孤劍芒光長依死士之壟以君厲魄能無式憑者乎君事慈母田如母挈家南北輒輿楸枌

以行泪其歿也君方失館武昌貧幾無以爲歛名滿天下而不得一館行齊古人而不理於

□君子猶或傷之娶于王生子三□念田□女子子一適潘繼娶于黃生子五□□□□□□

並幼□□蚤卒念田知禮能傳記誦之學喜孫醜孫爭說汪洪有子到漑到洽無慚任昉之知不又可以寒秋草之悲殺自叙之怨乎君嘗作自序比所爲劉注三君余忝長君一歲結契三十年同岑異苔畧分無以知君學爾枘我鑿持論又各不相能而君也偶別三日非我不樂我也結言千里微子安歸曾誦盜憎主人之言輒改容以謝脂習今數公爲始滿之歲方移書以論孝章豈知述作之志斐然而論定之知己渺嗚呼哀哉零落山邱淒其風雨車過伯山壽藏有懷一卷之古文心儀邠卿畫圖虔寫四賢之遺像爾

### 番禺羅鈞任先生墓誌銘

君諱文榦字鈞任番禺人也其先居江西南安元季之亂踰嶺爰居栖屨珠江織席粵市備著艱苦卓絕行事石慶對馬傳其謹愿仲子辟纘著其廉方者舊矣君秉确犖之姿修峻偉之儀冠冕南州知今知古顧岸稟未滅烟霞結性澄清之志雖略同於士稚無懷之民殆踵武乎東臯柄政窘其不阿史臣謂其能直道搖世法還我青氈殘賸河山罔歸餘骨亦可悌已君蚤歲讀聖賢書明春秋法恫洽外法權之不立傷法制構杙之未修卒走牛津大學治

羅馬法及法制史者四年辛亥端歸義旗飄舉助都督胡漢民長司法廣州旋除大理院總檢察長大理院院長馭歷槐棘之庭折衝樽俎之列卿真強項楊氏子何事不了張乖崖屬盜竊大弓虎將改玉一章露布萬方風從於是乎有西南之役海珠之難君亦不自意全也護國軍救需人彌亟獻身報國百瘁何辭綜其平生疊膺法制編纂局副總裁北京大學法律教授司法部總長財政部總長兼代國務總理國民政府外交部長兼司法行政部長新疆安撫使黃埔開埠督辦國民參政會參政員學仕並優望實交茂進負萬鈞之重怒率勤王之師而退艱儋石之儲生深沒世之疾泊金陵瓦解閒竄荒谷暴髻碣石之上誅茹人境之廬蕭然琴書幾番風雨予嘗省君從化溫泉西顧而笑王勝之讀完通鑑並世一人趙正平半部論語以治天下隆中高臥隴畝之間希文秀才江湖之遠齒胷於焉投轄鬻序爭擁皋比言泉流辱春風沁骨謂非吾黨之小子而誰與私意天將降大任於是人乃恨別心驚感時淚涸東山謝客南海沈珠竟客死樂昌永歸蒿里尋所致疾雅非不治君瀕死時猶自負不奴令斯人歿而若輩生滋可憫已得年厘五十有三實辛巳三十年九月十六日巳時

顯宦半世盡亡其財君十一介第文柏自香港飛粵北綱紀其喪不遠赴不受賻撫猶子明述明遠明邃等如己出壬午吉月寄瘞君於樂昌鶴冲鄉之原禮也復襪被平石野次迹故人黃際遇書丹碑額且命志銘嗚乎能以禮讓世高延陵之風撫我則兄感甚潁濱之痛君自千秋我慙一字愴悵逝水悵悵屋梁爰爲銘曰

豫章榭枌嶺梅喬榕國以爲寶氣之所鍾處士虛聲均儒亂法讀書宰相彪蔚鴻業仇夷狃習變而媚夷一士諤諤回紇遁師敬仲筦財好時奉使不畏疆禦皆如旨意別館之羈非其罪也爲人受瘡直在天下洪水西流弭節金陵出入賊中百憂內蒸林下一人年未中壽窮愁虞卿其舍大受寇亦能往臨於都亭每懷王室敢對伶俜如何旱天不遺一老運扈龍蛇致身恁早脊令在原孝水未枯營魂流寓攀柏路隅死士之壟先生之風永夜何依芒光熊熊

### 鄭列婦羅夫人秀貞權厝墓碣

列婦諱秀貞廣東中山縣羅翁耀坤次女也歸興寧鄭副教授海柱五歲而遇難粵北坪石

卒以烈傳其同寮里人黃際遇偷活臨武草閒聞訊逾月道連州途次有指目之曰此列婦羅氏之夫鄭君也爲之肅然請內交乞狀而綴文表之曰列婦生長海埂性如山屹所居近小人之市所畏胥聖人之言爰能自言卽標獨步讀書每窺一豹臨事已無全中敵騎東馳侍親北徙樂昌月好却愴懷破境之詩武水流長問何處折梅之使太歲在辰迢冰未泮迢其吉兮來嬪於鄭竊聞夫子高義無間彘弟之言期而抱男彌傷椿樹於東阡再索得女聊慰萱草於北堂雝雝鳴鴈之歌藹藹吉士之什同甘苜蓿何羨鴛鴦戚尙挹其霽清渚之不濁臧獲未供箕帚貧也奚傷奈何雹碎春紅霜凋夏綠林隕秋風淚斑冬竹竟於中華民國建國之三十四年一月二十五日樂昌垂陷坪石以舟車孔道先入賊敵甲申移鼎又三百年思宗殉國驂如一日列婦聞變神志凝然奉威姑從夫挈負子女避亂荒村靈石壩賊一日闖村搜劫者七次乃隨土人越叢藪竄岩穴而賊迹蹤至矣刃脅逃命者魚貫歸村歸村云何尙堪問哉列婦負幼女授鍾少眉而鍾已反縛領之而已迺從容回顧鄭太夫人日您平安立縱身百仞懸岩峻墜深澗得年二十有三時也蕭蕭苦雨寂寂咽泉目擊者愕然四



無人聲耳聞者，黯然銜酸，東指迅羽早落，忽焉優曇之花，驚翻凌霄，恥入婦人之集，斯則自經之痛，無忝于樂羊子妻，而嗜義之重，有甚于熊掌之欲者矣。教授愴目墜弦，傷情故劍，撫遺屍而腦已裂，覓薄棺而空無維束，芻附身一坏，埋骨千行，淒淚安往，封齊女之墳，一片瓣香依稀，認韓陵之石，貞松深處，默志故封，精衛嗚時，永銜東海，自大盜移國之年，迄君子沼吳之日，蒼蒼正氣，幾沒蒿萊，凜凜大義，特存巾櫛，雖則倉皇激葬，彌不掩萬丈光芒，適鐸采風，或無慚一字碑碣爾。

### 澄海黃處士誄

中華民國二十有二年十月某日，澄海處士黃雲谿卒。黃際遇在膠州饗舍，聞耗，既爲聯弔之空山，殘月長夜，秋霜顧景，倮然情不自克，用述曩契，發其慕哀，僭綴誄詞，表茲明德。誄曰：我昔負米于役，武昌歲行在丑，閔遭父喪，我家小子其猶其狂，求師於鄉衆，僉曰：黃八年以茲，羣士之坊，獲此明師，道義餼糧，小子有造，長毋相忘。我之識君，垂四十紀耳，長者言信，佳士信於人者，在工八比，謂以青衿如拾芥耳。長沙使粵羣流所歧，我亦隨班名後于子胡，是

區區童頭豁齒世方相尤吾獨否否君之至處在彼非此我忝知君父書能讀父名諸生頗涉小學君我言時漣洏以哭二旬之間兩喪生鞠方罄所有四金不足傷哉貧也典券可掬歛正無贏祭安得肉孺慕終身疇若君篤虔數君行敢譏薄俗如此畸儒乃真人師鱣堂棠蔭春日遲遲何幸寒門弦歌被之蒙以養正四子爲基行有餘力遷史唐詩夫子循循善爲說辭尋良師者指振祖祠時雨化之樂哉諸兒善狀我乃不如追維前言輒爲軒渠何圖戲言生說書如講故事爺講故事乃如說書諸兒善狀我乃不如追維前言輒爲軒渠何圖戲言已成陳迹秋風一葉乍驚捐客子敬之琴山陽之笛彈不成聲節誰應拍滿篋君書比於球璧喪制一書厥辨尤劇不名之爭而實之覈展如之人其儀不忒履基典型俯仰瞬息空文馳哀酬君靈魄嗚乎哀哉

### 國立中山大學新校舍落成頌辭

代山東大學作

維繹艷電奉悉南華國學落成有期總理宏規式昭今日辟雍聲教冠冕萬邦豐表翼巍儀型多士曰儒以道得民之化諸生以時習禮其間上以紹夏校殷序周庠炳焉與三代同風

今復觀成均東序警宗隱然立類官極則

周五大學南為成均北為上庠東為東序西為棘宇中則辟雍也見白虎通

昔少陵廣夏徒具雅懷漢宮

長秋非庇寒峻茲者郁郁相望斌斌相屬訓深十年之做人樹百年之基粲乎隱隱各得其

所益州比于齊魯沐文翁石室之遺內史政被鄱陽傳虞溥學堂之教

虞溥晉昌邑人字允少專心墳籍郡察孝廉為鄱陽內史大修庠序

冊所載今昔同符考常袞昌黎之宦轍至今猶稱

常袞唐京兆人天寶進士駐潮州刺史為福建觀察使始閩人未知學袞為設鄉校教導之自是文風始盛

搢白沙九江

之流風其人宛在化行南國莘莘三千之徒運際昌期芊芊十一之典謹綴詠仁蹈德之頌

以達下舞上歌之情爾

### 澄海黃任初教授墓碑

揭陽姚梓芳秋園撰文

中華民國三十四年八月日會既投降華夏重光海內喁喁望治國立中山大學將自北

江遷校還廣州黃任初教授播越臨武事定趨連縣偕中大教務長鄧植儀等赴粵舟次

清遠白廟風急水湍十月二十一日凌晨更衣失足墜水鄧君驚覺懸鉅金急營救四子

家樞隨侍亦倉皇下水救卒以謬俗不救已溺增援力薄遂懼難得年六十有一當扶至

清遠城大殮權寄郊外海內聞變莫不震悼中大當局張雲王星拱金曾澄鄧植儀何春

帆等爰於石牌設黃任初教授治喪委員會伐石豎碑整理遺著國民政府明令褒揚稱君學術淵深志行高潔所以表彰至優渥其明年一月三日子家器等在邑黃氏振祖祠招魂致奠親友聞赴者逾千人不佞撰聯語輓之遣季子萬碩躬詣靈前叩奠以爲吾粵喪一大師吾家喪一益友學術前途損失甚鉅沉憂不能自解肺腑衷實之言誰可告語者當是時海道猶梗阻四月九日家器始得奔清遠扶柩至廣州將諏吉歸葬以書來告曰先君葬有日矣墓碑銘石嘗承夙諾乞撰就發下不則無以表諸阡中大師友亦以爲言郵緘督促語甚摯不佞與教授三世篤交道義相許誼不得以譴陋辭黃君諱際遇字任初號疇齋廣東澄海人也黃於澄爲望族父韞石先生諸生例貢以廉幹參與縣政者數十年有子二長際昌廩膳生早卒君其季也君生有異稟讀書過目成誦精力尤過人少有神童之譽年十三受知督學使者張文達公逾年科試一等補增生肄業汕頭同文學堂旋往廈門同文書院補習日文爲東遊計同人倡辦同文時嶺東儒碩推溫慕柳太史爲祭酒一時羣彥駢集或主講席或參籌議識君自茲始旋北遊君經廈院後東渡扶

桑入東京高等師範學校從數學家林鶴一博士習數理人知君文學數理極深研幾沈  
 博絕麗跨越近代遺著有續初等代數學譯注潮州八聲誤讀表班書字說疇盒數學論  
 文集萬年山中日記不其山館日記因樹山館日記山林之牢日記等讀君書者皆以爲  
 君學自東遊後始得之不知先生學術道藝接鄉前輩陳東塾先生之傳主講金山同文  
 時時椎演其說以啓迪後進諄諄不倦君及其門親炙者累年雖此後出國留東留美接  
 引通人廣拓聞見得以成學歸攷其淵源根植於家教之培養及老師宿儒之開發於早  
 歲者所積既厚其流自光也君既久遊東寓居江戶與范源濂經亨頤陳衡恪黃季剛友  
 善過從甚密爲學問之探討春秋暇日更與季剛從餘杭章太炎遊遍窺各家門徑畢業  
 後回國初任天津高等工業學校教授庚戌入都殿試中式格致科舉人不佞時已強仕  
 在北京大學猶未脫弟子籍君數走訪寓齋促膝密談徹日夜每相視而笑曰吾儕樂此  
 固不疲耶民國十年奉教育部特派歐美考察教育入美國芝加哥大學研究二年得數  
 學碩士學位歸君自日本初返國卽獻身教育盡瘁學術博綜中外終其身鑽研不厭餘

事博奕飲酒引吭高歌聲激越如洪鐘雖燕趙之士慷慨悲歌無以過之衣服飲食極樸素布衣敝履健步如飛善劇談終日無倦容體魁碩年逾六十壯王如四五十歲人踪跡遍南北歷任湖南省會考主試官河南大學校長及各大學文理工學院院長教授爲維護河南大學計會一度兼攝河南教育廳長雅非其志而抗顏爲諸生講貫娓娓不倦不離講座者前後垂三十餘年避難湘西猶與臨武諸生講經不輟桃李遂遍天下若國立中山大學校長張雲英士大學校長杜佐周蘭州大學校長辛樹幟皆君之弟子也孔子有言篤信好學守死善道斯二語惟君足當之遭亂隨校遷播席不暇煖竟爾清流授命濁世離塵正則追縱古今同慨悲夫君配蔡氏繼配蔡氏側室陳氏子七女三長家器次家銳三家教均陳氏出家器國立山東大學理學士數理文學得君之傳四家樞五家讓六家梓七家豹繼配蔡氏出女三楚文綺文陳氏出楚言繼配蔡氏出孫男三紹聞紹衣紹之女孫一紹芬君累世舊學承傳而門風未墜兄際昌又早逝至君瓜瓞綿衍才後踵起黃氏之門將自君而大君其可無憾墓在澄海龍田鄉崎溝之原其葬以卅七年一

月日山向遂琢銘以告百世下聞教授之風而興起者君子之澤不其遠歟銘曰  
聖祖學絕文將喪崛起嶺海一儒將道藝沉酣足供養揮斥羣言疇與抗皋比坐擁環馬  
帳桃李蘭桂交輝讓藏山撰述例獨叔有欲求之訊銘狀